



DECEMBER 2023

VOLUME 63 | NO. 12

Khristian Thukizakna



Khrist Hondampa A Piangta

EDITORIAL BOARD

Editor

Rev. Dr. S. Vung Minthang

Managing Editor

Rev. Thawndoulian

Contributing Editors

Rev. K. Kamchinkhup

Rev. Nenglian Vualnam

Production Managers

Rev. V. Thangkhanmuan

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

Design & Setting

Upa Khuplajem Guite

**Lakman:- Kum khat ₹ 150.00;
Dak ah ₹ 200.00; Bu khat ₹ 15.00;
Gamdang US\$ 20.00**

CONTENTS

1. EDITORIAL	: 01
2. KHUA LEH VENG A PATHIAN LIMSAKNA	: 03
3. KHRISTMAS MESSAGE	: 06
4. KHRISTMAS MESSAGE	: 8
5. PATHIAN LIMSAK TUAILAI	: 11
6. BIBLE STUDY	: 15
7. GAMMIAL AW	: 20
8. DORCAS CORNER	: 26
9. YOUTH CORNER	: 28
10. CHILDREN'S CORNER	: 30
11. REPORT	: 32
12. EBC INNSUNG THU	: 36
13. THU TUAMTUAM	: 37
14. ORDAIN SUNNA	: 38
15. KIPATHU GENNA/ THUMNA MAKAI	: 39

Thusuah ding piakna:

Editor,
Khristian Thukizakna
Dorcass Hall, P. O. Box - 6,
New Lamka,
Manipur - 795006, India.

*Thusuah sung-a kigente
Evangelical Baptist Convention
Saptuam ngaihdan ahi kim kholkei.
Thusuahte in amau thusuah ah moh a
pawtek ding uh.*

KHUA LEH VENG A PATHIAN LIMSAK

*“Na omdan uh Khrist Tanchinhoih toh kituaksak phot phot un”
(Phil 1:27)*

January kha apan kha sawm-le-khat sung ‘Pathin Limsakna’ chih thupi zang in lam tuam tuam ah i na genta uhi. Tuate hoihtakin zuichiat leng i omna khua-le-venng te uh Pathian limsak khua-le-venng asuakta ding hi. Aziak bel Pathian limsakna kichi Gospel toh kituak lungput leh hindan ana hi ahi. Tua Gospel bang ahihiam chih Bible a i et chiangin sawltak masate’n gospel ana gen uh Jesu Khrist ahi chih chiantak in amuh theih hi. Amaute’n “Khrist thu tangkoupih,” uh kichi hi (Nas 8:5). Paul in “Khrist Tanchinhoih...ka hilh kimta,” achi a (Rom 15:19), Korinthte kiang ah “Khrist kilhden ka gen uh” chi hi (1Kor 1:23). Paul thugen Dr Luke in a recordna ah hichiin agen hi “Jesu, Pathian Tapa ahihdan thu a tangkoupih zui ngal hi” chih i mu hi (Nas 9:20). Paul in Korinthte kiang ah “Jesu Khrist, amahmah kilhden a a om thu kia loungal nalak uah bangmah theih ka tum kei” achi hi (1 Kor 2:2). Tomchika gen in Gospel kichi Jesu Khrist ahi a, Jesu deihdan ahinna tuh gospel toh kituak a hing akichi hi.

I Khua leh Vengte uh en leng khristian kichi Jesu Khrist nungzuite khua leh veng ah Jesu Khrist mel akilang hia? Ahihkeileh, thanguaina, thilguk hihna khua, kumpi thil kham a sum dawnna, zu leh sa ne a zuautat namte i hi uhia? I dukante ua ser tehna gikdan gospel toh akituak hia? I van zuakte uh a rate dikmah a zuak i hi uhia? I thautui zuakte uh asiangthou hia ei control theihna chiang bek ah? Khosung makai leh thuneite’n Solkal apan hongpai mipi hamphatna dingte: PDS, Aganwadi, NREGS, chihte amudingte or a hamphatpih dingte kiang i tungsak uhia? Ahihkeileh, hiai biakin polam thilte leitung vai hi-a, Biakin sunga thilhihte khalam vai ahi chi i hi hiam ngaihtuah huai mahmah hi. Bible in “na omdan uh Khrist Tanchinhoih toh kituaksak un” achi Biakin sung kelevu genna hiding in i pom kei hi. Tua naksang in Bible in gingtute “chi” leh “meivak” banga Pathian ading a palaite nahi uh hon chi hi (Mat 5:13,14).

Pathian in siangthou ding in hon sam hi (1 Thes 4:7; 1Pet 1:16). Lungsim leh khalam siangthoute a polam zong siangthou tei tei uhi. Pathian in sunglam siangthouna leh polam siangthouna a ngai poimoh tuak tuak hi: Toupa'n khotang siangthouna a ngaihpoimoh dan hichiin agen hi. Giahphual polam ah zun leh ek thakna ding mun na sep ding uh ahi. Na vanzat lak uah ninluahna na nei ding ua; hichi ahi ding a, na dailen chiang un, huai in lei na khuak ding ua, zun leh ek na thak uh na vuk nawn ding uhi. Toupa na Pathian un lah na giahphual uah nou hon humbit ding leh na melmate uh hon pe ding in ahong tel ngal a. Huaiziak in na giahphual uh asiangthou ding ahi. Huchi lou in zaw na lak ua thilsiang lou amu dia, hon paimangsan ding hi (Deut 23:12-14). I kongzingte uh, i nullah kuak sung kepdan uh, i luiguam kepdate uh Pathian muhin kihhuai paimangsan tuak mahmah i hi uhi.

Pathian thilsiam kilawm taktakte tung a i tatsiat dan uh mulkim huai ahi. Pathian thilsiamte hinna neite toh leng khosa khawm theilou, melma et a en, thah di et a ente i hi uhi. Vasa muleng thah sawm, ganhing khat mu leng thah dia en, sing leh gua hing dipdipete toh nunnuam a khosakkhawm sang a satpuk a gam giau velvul a ten ut zawte i hi uhi. Thilsiam hun a Pathian in **hoih asa** (Gen 1:10) a chihite ei singtangmi khristiante'n hoih i sa kei ua, i gam i hihsia uhi. Lamka khopi ah Tedim Road leh Tipaimukh Road highway nih i nei uhi. Companyte' bawl lamlian kiang a chiamtehna safety sign tuamtuamte, reflector-te, crash barrier-te leh a dang tampi hihsiat leh gukmang pawl a omta hi. Hiaite khawng i gam i lei puahna hi a, bang ziaka hiaite khawng va hihsenak i di ua aw chih i ngaihtuah chiang in Pathian zahtaklouna toh kinaih mahmah gamtatna ahi. I gam tung leh i minam tung a Pathian alungkimna ding in i khua leh vengsung a kham theih chituam tuamte hihlou ding in saptuamten khamna a bawl ua, thuman i sawm hetkei uhi. Tribal khristiante'n Biakin sung ah kum 100 val Pathian thu i awita ua, tua kipan Biakin polam ah niteng nekzonna chiat ah Pathian thu awita leng i khua leh vengte uah Pathian limsakna hong tang khe ding a, Pathian thei namte chih in i om ding uhi. I omdan leh gamtat uh Tanchinhoih toh kituahsak ding gingtu mimal chiat mohpuak ahi. ■

KHUA LEH VENG A PATHIAN LIMSAKNA

- Rev Gin malsawm, DS/LND

Huaiziak in na giahphual uh asiangthou ding ahi. Huchi lou in H zaw na lak uah thil sianglou A mu dia, hon paimangsan ding hi (Diut. 23:14b)

PATHIAN LIMSAKNA:

Pathian Limsakna kichi Greek thumal nih *eu* - hoihtak a hih, leh *sebomai* - bia/zahtak kigawm *eusebeia* - hoihtak a bia, hiam chitaktak a zahtakna pia chihna ahi. Hiai thumalte apan in Greek-English Lexicon of the New Testament based on Semantic Domain in 'Pathian mitna (*godliness*) hiam Pathian in i hindi dan ahon chih bangtak a hinna (*to live as God would have us live/ to live as God has told us we should live*) chihna ahi.

KHUA LEH VENG A PATHIAN LIMSAKNA:

Atung a hihlchetna dungzui in 'Khua leh Veng a Pathian Limsakna' i chih chiang in Pathian in i khosung leh vengsung a om didan adeih bangtak a omsak chihna ahi. Pathian in ami Israel-te kiang ah tamveipi 'Na lak ua Ka om theihna ding in Mun siangthou hon bawlsak un,' 'Na

siangthou ding uh ahi, Kei lah Ka siangthou ngal a' chi in ana gen tuan zihzeh hi.

Khosung leh giahphual ah ngeina bang a sipawtte leh misi ziak a kisubuahte kiang ah sianlouhna chiteng apan kikep siang ding in thu ana pia hi. Galdou dia kuan sepaihte nasan asapum ua kipan sianlouhna pawt a om leh giahphual polam ah ki hahsiang phot ding chih ahi. Huan ah akivenbitna galvan ban uah zun-le-ekte uh vukna ding vanzat leng tawi tel ding in thu pia hi (Nam. 5:1-3; Diut. 23:9-14). Thukhunthak ah leng 'Sianthouna lou in kuamah in Pathian mel mulou ding' ana chi hi (1Pet. 1:15-16; Heb. 12:14).

KHUA LEH VENG A PATHIAN LIMSAK DING DAN:

Sianthouna lou a muhtheih vualloh Pathian Siangthou

i khua – i veng ah intek in sunglai tang hen i chih leh sianthouna lampi tawn ding a nakpi a kisuuk poimoh lai ding chihna ahi. Khua leh Veng a sianthouna dia poimoh bangzah hiam en ni:

Zu leh Khamtheih apan Sianthouna: I biak Pathian in leng sianthouna mah poimoh masapen a koih a hon hahsiang ut ahi chih achetna hi a i theih tuh i galbuai toh kiton in zu leh khamtheih khukupi hon hahsiang sak hi. Hiai mah Saptuam leh pawlpi tuamtuam in delhzui in tuni tan kal i suan zom thei ua kipah huai i sa hi. Theihtawp suah a panglai in zu leh khamtheihthe apan kihahsiang sipsip zoule i Pathian sunglai tang dia, ita-inaute zu leh khamtheih toh kihetkha lou khanhoih-khanpha in hong khang ngei ding uh chih i lamen tinten hi.

Inten-Louten a Sianthouna: Nidang in i pi-le-pute huangvulh ganta toh ana tengkhawm ua inn mial khepkhup sung ah hikpi, hahpi leh uihik-akhik toh ana khosa khawm uhi. I gam a Khristianna ahonglut toh kiton in sianthouna toh hong lutkhawm in kipahhuai i sa petmah hi.

Siamsinpawlpi kiphuhkhiak tunglai in inn zut didan, bel nawt didan khawng kisinsak ua manpha i sa petmah hi. Ei sang a gam changkang zawte toh kiteh in inten-louten, inkiim – innpam, huanhai, sing-le-loute kep sianthouna ah kalsuanna ding omzek lai in i thei hi.

Huangvulh-ganta a Sianthouna: Nidanglai in i gankhoite toh tengkhawm in, huangvulh gantate khahzan in kholak teng gankhoite ek in dim sek hi. Tuni chiang in khoteng phial ah i gankhoite ki kulkhumta in apoimoh bang damdawite kikap theita a kipahhuai hi. Huaiziak in nidanglai sang in i gankhoite damthei zaw ua, khosung leh vengsung a thousi-thouvai kiam sak in natna mah leng tawmsak hiaihiai a kipahhuai i sa hi. Tusang in i huangvulh – gantate duat zolai in kemsiangthou zolai leng Pathian Limsak i hihna honglang chiang zosem lai ding hi.

K h o s u n g - V e n g s u n g Sianthouna: Kho khenkhat ah sawtpi hita mahleh i khuate khenkhat a dailenbuk i neih uh sawtlo nailou hi. Anei sunte a leng dintheihlouh

neu chetchut khawng in kibawl zomah hi. Tuchiang in khoteng ah dailenbuk leh kibualbuk hoihtaktak i neita ua kipahhuai mahmah hi. Ei sang a changkang zaw te'n hiaite limbawl mahmah in 'tawldamna mun (*rest room*)' bang chi hial uhi. I khosung leh vengsung a ninpaihna leh sing-le-loute hahsiang sem leh bawlphat sem poimohna mun tamtak omlai in i thei hi.

Nek-le-dawn a Sianthouna:

Gam khangtou teha hoih mahmah khat tuh nek-le-dawn sianthouna ahi. Nam changkang ten damtheihna ding in ne in dawn uh a, nam niam ten gilvahna ding in ne uhi. Tu chiang in ei lak bang leng nek-le-dawn ah kisiangthou sot mahmahta in, tamtak in damtheihna ding in kine-kidawnta a kipahhuai i sa hi. I sianthou semsem leh mite zahtak leh ngaihsan khua Ieh veng hi ding i hi.

Silh-le-ten a Sianthouna:

Milim pathiante toh i biak Jehovah Pathian kibatlouhna khat tuh amite silh-le-ten di tanpha ngentel tak in hon telsak ahi. Laisiangthou ah kichei didan tamveipi i mu hi cf. Ex. 28:2-4; Diut. 22:5; 1Kor.

11:14-15; 1Tim. 2:9. I Pathian in numeite kichei didan, pasalte kichei didan, siampute kivat didan, lusunte kivat didan leh adangdang chiangtak in gen sitset hi. Pathian hing gingta ei gingtute ading in silh-le-ten a sianthouna in gingloute toh i kilamdanna gen geih ding hi. Huaiziak in Pathian Limsak ten khatpeuh silh a teng mawklou in, ei hihna toh kituak dia kivat Pathian deihdan ahi gige hi.

THUKHUPNA:

I khua leh veng ah i Pathian Limsakna mite muhtheih dia ataan khiak ngeingei ding ahi. Kuahiam gingtu hi in ginglou khatpeuh in ikhua-iveng ah atung a kigen Pathian Limsakna chiamtehnate amu mah di-uam chih mimal kidong chiat ni. Huan, ikhua-iveng a miten Pathian Limsak i hi chih ahon muhpih theihna ding un panlakna ding i nei chiat uhi. Toupa'n theihtawp suah zou zel ding in hon vualzawl hen.

'Taang in Jesu, Pa thupina'n ka gam uh zelsuak in; Kuang in Khasiang, ka lungtang uh kuangsak in; Luang in luipi, hehpihna leh zahngaihna'n namte jel in Na thu puang in Toupa vak hong taang hen'. ■

KHRISTMAS MESSAGE

- Rev Thawndoulian, *Director of Ministries*

“Lau kei unla, ngai un, michih ading in Tanchinhoih kipahhuai mahmah k'on tut ahi. Tuni'n nou ading in David khua ah Hondampa a piangta, amah Khrist Tounpa ahi”. Luke 2:10, 11.

Litung a mikhialte tanding a Jesu Khrist mihing bang a Lhong pianna ni theih gigena a champha Khristmas ni muthei nawn leh lawm thei nawn ding a i om man in lungdam huai i sa mahmah hi. Mihingte i tenna mun a tuam dungzui leh i mel leh puam te uh akibat louh dungzui in Khristmas leng tup leh ngim ban in zatdan chituamtuam omsak theih hi. Khenkhatte ading in inkuan kim a lawm leh vualte toh kipahna leh nopsakna hun a zatna leng ahi thei hi. Khenkhatte ading in lah hun mualliamsate, it leh ngaih hon paisansate ngaihna hun leh thawmhau leh lungzuang tak a zatna hun hingei in i gingta hi. Khenkhatte ading in lah kha lam lungzuang leh Pathian ngai ngoihngoih a biakna leh phatna hun ahih ngei i lamen hi. Huchi bang kal ah nang tun bangchi bang in na zang dia? Bang chibang bang a zang ding in na kisakhawl a?

Tukum Khristmas hunzatna ah Jesu Khrist ading in bang ka sem thei dia, Jesu Khrist nasepna maban bangchin ka sunzom thei dia chih ngaih tuah kawm in Khristmas hun zang leng ut huai ka sa hi. Manipur Singtangmiten lamet leh ngaihtuah phak ngeilouh haksatna Phaizang mite akipan i tuak ua, thah chimih leh nuai mangvek ding a delh in i om uhi. In leh lou, neihlehlam tampi tak ban

in unau tampite hinna laksak leh suksiat in i om ua, belh ding dang nei lou in Refugee Camp ah kikhum khawm tampi tak i om uhi. Huchi bang hun in Jesu Khrist itna leh hehpihna, thuakzohna leh kiniam khiakna lungtang toh Khristmas hunte zang leng ut huai ka sa mahmah hi. Tuni tan a Lauhna toh kidim Meitei Leepun leh Arambai Tenggol te khutlum thuak a om ulehnaute khamuantu hiding

in Jesu a ITNA mah lang sak ni hang. Lau kei unla ngai un ---- nou ading in Tanchinhoih kipah huai ka hon tun ahi --- David khua ah Hondampa apiangta Amah Khrist Toupa ahi... tuni in lau thawng leh thawm hau a omte ading in Hondampa hong piangta ahi... i pai mengmeng ding ua... Toupa Angel hon hilh bang in i va en ding uh... Toupa kiang zuan ni.

Jesu'n mun nuam leh thupi etlahhuai tuntun Van mun thupi nusia in mun niam pen leh kihhuainamun pen tel in Bawng in daidam sung ah, daipam mi gen thei Mary sung ah hong piang hi. Mihing te kisial ngei louhna mun Gankuang sung ah hong kisial masa hi. Vaihawmtu ding leh thuneihna tawi ding in ahong pai kei a, himahleh Itna ziak a hihdam ding leh eite Itna hong lak a i khelhnate ngaidam ding in a hongpai in, a hinna hong pia hitel lawmlawlm hi. Huai hinna pen kuamah dang ading hilou in nang leh kei ading ahonpiak ahi. Mikhial mohpaih a om, sihna tuak ngeingei ding a om lai Toupa

Itna leh Hehpihna i tan tel lawmlawm uh lamdang lua hi.

Hiai hehpihna leh Itna i tan te uh enleng midangte kiang a laksawn aphuangzak a, pesawn ding in nang leh kei hon lam-en in ahon ngansiah hi.

A ngaihdamna tangtak lou ten tang i hihman un en leng midangte hiai bang in ngaidam leng ut huai ka sa hi. I nam sung ua i poimoh tulaitak in kingaihdamna ahi. Jesu Khrist a om ngaihdamna mah in unau khat leh khat kingaidam leng ut huai ka sa hi. Suahtakna leh zalenna Jesu Khrist kiang ah om a, huai koppihite hiding in henkol i kibuhssakte uh sut khia in Jesu ITNA leh LEMNA mah lak khia leng uthuai ka sa mahmah hi. Jesu Khrist a om hinna pen i niteng hinkhua ah langsak in, khelhna mial nuai atute leh lungkham mang bang a omte kiang ah Taangkhesak chiat ni.

“Toupa, na Pathian, na lungtang tengteng in, na lungsim tengteng in na IT ding ahi; Nang na ki it bang in na Invengte na IT ding ahi” Luke 10:27. ■

KHRISTMAS MESSAGE

(La a leng sak theih)

- Rev.Dr.M. Khamkhanchin, Dorcas Hall, New Lamka

KEIMAH VANG HI THIANMANG VONTAWI!

Khaw-omdante hong kidang in, khua hong vot hiauhiau pan nawnta, Christmas 2013 galdot theih dia hong om nawnta. Tirruvallur, TN a ka omna inn tung (terrace) ah nitak mimal thum hun, dak 10:00pm vel in keikia in ka om a, awlawl a thum leh phatnalate sa hiauhiau a hun ka zat kawmkawm in tunglam ka entoua, gennei tak bang in (banghiam hilhnop hon nei bang in) van aksi tang silsialte ka mu hi. Pathian thilsiamte lak a lamdang mahmah AKSI phe liplip, tang silsialte'n I Hondampa Jesu hong pianni zan, "*zan khua dai, zan khua siang...*" hon ngaihtuah sakta hi. Ngaihtuahna saupai mahmah in, Bethlehem bawng inn sung, gan ann-piakna kuang a lum bii bei naungek, I hondampa hon musak hi. Ka lungsim mitkha in huai naungek hon muchiang sak mahmah in, hiaibang lawmlawma ka Toupa'n hon na it ahi mai zen maw... chi in kipahna leh lamdang sakna toh biang langtuak ah khamvuallouh in mittui hong luang zoihzoih in hiai bang in kon chikheta hi, ***Keimah vang hi Thianmang vontawi***, ...Kha in hon muchiansak lua ahih man in khitui hong tam luan sem sem ... Sunzom nawn...***Gan ankuang sunga na hong zaal! Hiai bang lawm lawm itna lamdang,.. Aw kei phulou lua... aw kei di'n lawm lou hi!*** Khitui nul kawmkawm in hiai la hong kigelh khia leh hong piangkha tuh a himai hi.

Hong kipuahkhiak nung Khristmas hunte ah Solo / Pawl in kisa tou zel, Toupa kia thupina i pia hi. Kuapeuh hiai la, ana sa kha te'n, i Toupa'n, it taklou nang leh kei hon it ziak a, gentheihna chiteng hong thuak dante lungsim thuktak a ngaihtuah kawm in '***Hiai bang***

lawmlawm itna lamdang,.. Aw kei phulou lua... aw kei di'n lawm lou hi! chi'n zaila'n awi ni!!.

1. Kumpi Kaiser a maan/lal lai in, khovel kisimpi ding thu hon puang. Gam vangla pan minkhum ding

in, Kho-ul kai niu-niau in Bethlehem zuan.

Hilhchetna: Tanglai pek a zawlnei in a na genkholh, “Aw nang, Judia gam a Bethlehem aw; Judia khopite lak ah na neupen kei hial, na sung a kipan ukpa hongsuak ding ahi ngal a,”(Mik.5.2 cf Matt.2:6) ana chih a tangchin na’ng in Rom kumpi, Kaisar Augusta in khovel (mi) tengteng amau khua chiat uah min khumding thu a na pia hi. Joseph leng David innkuante leh asuan ahihman in Galili gama Nazareth khua a pan Judia gama David khua Bethlehem ah, a zikham gaisan laitak thuai in hoh uhi (Lk.2:5). Nazareth leh Bethlehem kikal gamlahun mahmah, mi tangpi a ding a nili (4days) vingveng khe/sabengtung a pai ngai ahi hi. Mari gaisan laitak ahihna ah, Joseph in sabengtung tung a tuangsaka paipih hileleng, awl deuh a paipih ngai khading in ginhuai hi (Nupi gaisanlaitak, na paipih khak ngeileh na thei ding). Tua a hihna ah mi’n nili (4days) alakna uah, amautegel in kalkhat bang la maithei uh hi. Tua ahih man in, lungsim ngaihtuahna a honglian mahmah tuh: *kho-ul kai niu-niau in Bethlehem zuan...*chih

in leng genchian/kha zoulau lai maithei hi.

Sakkik:

Keimah vang hi Thianmang vontawi, Gan ankuangsunga na hong zaal! Hiai bang lawm lawm itna lamdang,.. Aw kei din lawm lou hi!

Hilhchetna:*Hiai bang lawmlawm itna lamdang aw kei di’n lawmlou hi.* “Na ne ding uh ahi kei, khoih leng na khoih ding uh a hi kei, huchilou in zaw na si ding uh” (Gen.3:3) chih thupiak khauhtak mai bohse teitei, thumanglou tate i hih lai un... I Pa Pathian in a Tapa tang neihsun, thumangloute hongtankhe ding a, Serafte’n “A Siangthou hi, A Siangthou hi” chi a a biak chim ngeilouh uh, A thupinate nusia a lei mihingte tan dia hong pai, gan ankuang sung a hong kisial ta mai tuh- “*Hiai bang lawmlawm itna lamdang ..aw kei di’n lawmlou hi*” chihlough theihlough ahi hi.

2. Ami zata’n khaulbuk luah dim, Vanmang ta’n lu ngak na’ng nei lou, Muikhua hong zing zankhua hong dai, Liangvai lua Mari nuihmai him him lou.

Hilhchetna: “Khualbuk a a taklough ziak un gan-an piakna kuang ah a sial hi” (Lk.2:7b). I Toupa mahmah in hiaibang in a na genchian hi. “*Sehalte’n kua a nei ua, tungleng vasate’n zong bu nei... himahleh Mihing Tapa in lu ngakna’ng neilou...*” Mary, mihing hihna ah a ngaihtuahna paisau mahmah ding in ginhuai hi. Damdawi inn a nauneiding, nurse/doctor om, nu ahikhkeh sanggamte’n hon ompihlai ua leng huphurh tuntun sekte i hi uh. Endih hiai ah Mari, nauneih dek dan a chi tuam tel mai? Bawngbuk a nauneih ding..., ??? Muikhua hong zing in zankhua hong dai zekzek ta, Lungsims mitkha in en mah dih, Mari, ***Liangvai lua Mari nuihmai him him lou.***

3. Tua zan khua mial leh dai nuai ah, Thianmang vontawi mimbang hong piang, Bethlehem bawng inn dai dam ah, Na zaalna laikhun nang di’n lawm lou hi.

Hilhchetna: I theihphak tan ah, a zawngpen in leng Bawngbuk sung peuh a naunei suk mai chih omzenlou hi. En dih lawm aw...Lei leh Van leh a sung a omtengteng Siamtu leh

Thuneitu, Pathian hing Tapa: Thianmang’ vontawi pianna di’ng in Bethlehem bawng inn daidam hi tel, gantate ann piakna kuang a hong lum bii-bei mai tuh... *Na zalna Laikhun nang di’n lawmlou hi!* chih tuak mahmah hilou hiam unau!

4. Tu ni’n ka lungsims bawng inn uah, Hong piang pha nawn ve Mang Jesu, Gan annkuang a nong zaal bang in, Ka lungsung na zaalna laikhun hi hen.

Hilhchetna: Naungek, I Hondampa Jesu, Bawnginn sung a, Gan ann piakna kuang, a zalna dia hong zat a, hong lup bimbem bang in, I lungsims bawnginn chiat uh a zalna laikhun hong hi leh uthuai na tel e maw! Tua ahikh man in hiai bang in Amah chial ni:

Gan annkuang a nong zaal bang in, Ka lungsung na zaalna laikhun hi hen.

5. Ka hinna in Toupa pahtawi e, Ka kha’n nuam in Tanpa phat in, Ka lungsims leh kha leh pumpi, Na mai ah siangthou pomtak hong hi hen!

Hilhchetna: Khaile, tuin, Gen vuallouh, Teh vuallouh itna a

hong it a, eite tan dia hongpai
i Hondampa lak a i piakthuk
sam theih tuh hiai bang hileh
i chi:

*Ka hinna in Toupa pahtawi e,
Ka kha'n nuam in Tanpa phat
in,*

*Ka lungsim leh kha leh pumpi,
Na mai ah siangthou pomtak
hong hi hen!*

Hiai bang chithei ding in i biak
Pathian in Simtute tengteng
hon ompih chiat hen aw. ■

PATHIAN LIMSAK TUAILAI

- K.K. Ching Tonsing, *New Delhi*

Thumapi: Tukum i saptuam EBC thupi ahi “Pathian Limsakna” chih toh kizawi tawn a, EBCC Delhi (Dwarka) in “Pathian Limsak Tuailai” chih thupi zang a article gelh theihna hunpha hong bawl sak ziak un i biak Pathian leh heutute tung ah kipahtu hong gen masa ing. Hiai article in ‘Pathian ichih kua hi a?’ chih leh ‘Tuailai i chih bang hi hiam?’ chihte sui suk masa ding hi. Huai zom in ‘Tuailai Pathian limsak bang chihna ahia?’ chih leh Laisiangthou in a taklat tuailai khenkhat Pathian limsakna ziak ua vualzawl a omte en suk ding hi. A tawpna ah tuailai hun a Pathian limsak manphapen ahihdan taklang in thukhitna toh zou ding hi.

Pathian i chih Kua Hi a?
Pathian i chih lei, van leh a sung a om nuntakna nei khempeuh leh na khempeuh asiam Pa leh a nei Pa ahi (Gen. 1:1-25). Tua Pathian in thilsiam dangte toh kibang hetlou in mihingte akhut mahmah toh hong bawl a, a hinna hu hong pia in, hong vualzawl lai hi (Gen. 1:26-30). Pathian in a bawlsa mihingte nat-leh-

sat, lungkham-mangbat leh gilkiyal-dangtak thuaklou ding in taksapna chikim omna Eden huan mun nuamtak ah hong tengsak hi (Gen. 2:8-18). Himahleh, a siamsa mihingte'n Setan khemna thuaklah in, nek louh ding achih singgah anek man un, mikhial hong suak un, Pathian in Eden huan pan in hong hawlkhia tamai hi (Genesis 3:23). Ahihhang

in, Pathian in hong itna na beituau lou in, mikhial i hih nung nangawn in hong nuse tuanlou in, itna tak toh hong sam tou den hi. Aman, "...hong pai un, ngaihtuah khawm dih ve ni! Na khelhnate uh san-au bang in aom mahleh vuk bang in a ngou ding, sandup bang in san khin mahleh belam mul bang in a om ding" chi in hong sam tawntung hi (Isai 1:18).

Ahihhang in, mihingte'n Amah kiang kizuan ut tuanlou in, meidil lam zuan in i pai teitei uhi. Pathian in itna tak toh hong sap nung nangawn a, Amah kiang zuan ut tuanlou mihingte i hi uhi. Himahleh, Pathian in amel batpiah a hong siam mihingte hong it luat ziak in Amah kiang i kik theihna ding un zawlnei tampi tak hong sawl hi. Tua zawlneite tungtawn in Pathian in hong samsam mahleh mihingte'n a kiang kizuan nuam tuan lou hi. Toupa'n a hong siamsa mihingte tangtawn a mangthang petmah ding i hih dan uh theichiang law mahmah ahizhiak in, atawptawp in eite ading in a tapa tang neihsun Jesu eite tan ding in leitung ah hong sawl hi (Johan 3:16). Pathian hong

itna leh hong angvanna ana theichiang law mahmah khat in hiai bang in la na phuak hial hi: Mihing bang atel hiam! Thianmang? Na Ta thangvan nusia Non sawl; Na itna thuk! Na itna sang, Thianmang! Mihing pilna lung-in gel maw'ng.

Hiai laphuaktu mah bang in, ei tuailai te'n zong Pathian in a hong itna leh khotuahnate suut in theisiam leng, Amah kiang loungal kuamah i belh ding omlou ahidhan ki theisiam ding a, Jesu neih kaan a leitung a amanpha omlou ahih dan kitheisiam ding hi.

Tuailai i chih Bang Hi Hiam? Tuailai i chih bang ahia le?
 Khovel a i nuntak sung in, hunbi poimoh mahmah thum kinei hi. Khatna ah, naupang hun hi a. Anihna, tuailai hun hi a. Athumna, tek-le-vuai hun ahi hi. Hih hunbi thum teng lak ah apoimoh leh manpha penpen tuh 'tuailai hun' ahi. Naupangte'n nungak-tangval (tuailai) hihkal ngaklah in gal et den uh a, tek-le-vuai te'n zong a tuailai ni te uh ngai in nunghei kik den uhi. Huaizhiak in 'tuailai hun' hih khovel

nuntakna ah a manpha pen leh nop i sak pen hun ahi hi.

Napangte ahihle nu-le-pate sinsakna leh etkolna nuai a omlai hi a, mahni kitoudelh taktak thei nailou uh ahi. Tuailai hun ah bel, pichinna khat ki nei theita in, thagui-thatang hat in lungsim ngaihsutna kizang thei a, i tup i ngimna khatpeuhpeuh i sep khiat a i tangtun zohna hun ahi hi. Alang khat lam ah, innsung mohpuakna tam nailou ahihman in zalen leh nop i sak hun laidak zong suak hi. Khangham tek-le-vuai hun ah ahihle khut leh khe, thagui-thatang hat nawnlou, theihna leh chepteh theihna lungsimte kiamta, mit in zong hoihtak in khua mu chian thei nawn pha mel lou, bil in zong khua za chian nawn mel lou, ha te bei in duh leh deihte zong deihsang tak a ne thei nawn lou, alim a-al zong khenchian thei nawnlou, mohpuaknate zong duh thusam tak a sep khiat zoh nawn louh hun ahi hi. Huaiziak in, kumpi Solomon in agen bang in tek-le-vuai hun ah kipahna taktak om thei nawn lou hi (Ekljiasti 12:1). Huaiziak in, i nuntakna hunbi thumte lak ah 'tuailai

hun' pen a manpha pen leh anop pen hun ahi hi.

Atung a i gensa bang in, tuailai hun ahihle leh i thatang hat laidak hun, i lungsim hat mahmah laidak hun, i sepnop khat peuhpeuh i sepzohna hun ahi hi. Tua ahihman in, i tuailai hun ah aselam ah i tot khak leh asetawp dong kitung thei a, ahoihlam ah i tot khak leh zong nahoih na manpha tampi kistem khe zou hi. Tuailai thil hoih sem nuam lou, gah hoih suang nuam lou kua i om dia? Huaiziak in, i tuailai hun ah gah hoih i suang theihna ding in Pathian limsak a, Amah deihnate zong a, zui a i khosak ding hun ahi hi. Leitung a mipilpen leh mi lohching mahmah ahi kumpi Solomon in zong na hoih leh gah hoih suang theihna ding thuguk hichi in hong hilh hi: "Na lungtang tengteng toh Toupa muang inla, nangmah theihnamna ah kinga ken" (Paunak 3:5). Huai ziak in, i tuailai hun ah na hoih i sepkiak theihna ding in, ei theihnamna ah kinga lou in, i lungtang tengteng toh Toupa muang a, Amah ilimsak ding poimoh hi.

Tuailai Pathian Limsak Bang Chihna Ahia? Tuailai Pathian limsak i chih chiang in, gamtat-luhek, tutdan-khawldan, kampau-mukpau, nek-le-dawn a kipan ngaihsutna dong a Pathian deihdan toh kituak a, siangthou tak a nuntakna ahi hi. Ahihleh, tuailai Pathian limsakna toh khosak taktak theih mah ahi diam? chih dotna om thei hi. Hiai dotna diktak (genuine) dotna ahi a, adawanna ahihleh i Laisiangthou in ettehna (example) hoihtak toh hong taklang hi.

Laisiangthou Sung ah Tuailai Pathian Limsakte: Laisiangthou in tuailai numei hitaleh pasal hitaleh, Pathian limsakna toh nuntak theih ahih dan ettehna hoihtak hong pia hi. Article thumal a limit ziak in huai ettehna hong kipe te tomkim tak in i ensuk ding. Tuailai mipil leh fel mahmah Daniel leh alawm teng thum in Pathian limsak in, nek-le-dawn ah siangthou tak a a kikep zoh ziak un, Toupa'n Babylon kumpipa Nebukadnezar deihsakna sang pen tang sak in gamsung ah vaihawm makai lianpente in pang uhi (Daniel 1:8-19). Tuailai Joseph

in Pathian limsak in angkawm dia khemna nial in, a haksat hun ah zong phunphun het lou in Pathian muang ahihman in, Toupa'n Pharo kumpipa deihsakna tangsak in Egypt gam ah dinmun sang pen hihna ngahsak hi (Gen. 41:37-45). Tuailai mifel tak Ruth ahihleh Moab minam, Pathian muhdah leh a kihmahmah minam pan himahleh, aman a pasal sih nung in, a teeknu taisan mailou in a lungsim teng toh zui tinten in kem ahihziak in Pathian deihsakna thupi tang in, Bethlehem khua a mihaupa Boaz toh kiteng sak in, i hondampa Jesu hong pianna guipi khat hong suak hi (Ruth 4:10). Tuailai Mary in a nungak hunte Pathian limsak in siangthou tak in kikem ahihman in khovel a nungak teng in alunggulh mahmah khovel hondampa Toupa Jesu suahna nu hihna tang hi (Luka 1:30-34).

Hiai atung ate i et Daniel leh alawmte, Joseph, Ruth leh Mary te'n kibatna khat aneih uh tuh a tuailai hun un Pathian na limsak chiat uhi. Amaute tungtawn in tuailai numei hitaleh pasal hitaleh, Pathian limsakna toh ki khosa

thei taktak mah ahi chih hong musak hi.

Thukhitna: Ka tuailai pihte aw, i tuailai hun in Pathian limsak ni. Tuailai hun a Pathian limsakte mah mi hampaha pente ahi uhi aziak ahihleh Aman Daniel, Joseph, Ruth leh Mary te bang in thupha pia in anuntakna uh sangpi in domsang ding hi. Huaiziak in, van, lei leh

thil bangkim asiam Pa i biak Pathian hing limsak in tuailai hun manphate Amah deihsa bang in zang leng, Aman leivui pan in hong lamtu in, niinphual pan in hong domtu ding a, Abraham bang in mi dangte adia vualzawl naak hi ding in hong bawl ding hi. Huaiziak in, Pathian limsak tuailai hi theichiat ding in i biak Pathian in hon vualzawl chiat ta hen.

BIBLE STUDY



Pastor Tualthianmung Hangzo, Area Pastor, EBCC Bukpi

Text : Kolosate

Thupi : Khristian Innkuan omding dan (3:18-4:1).

Thumapi: I hondampa, Jesu Khrist, pianchampha i lopna kha “**December**” hon musak i biak Pathian min ka phat ahi. Kha masa in gingtute omding dan toh kisai i na suutkhawm khinta ua, tu December kha in khristian innkuan sung a khat-le-khat kizopna leh mohpuakna khenkhatte suutkhawm leng i chi ahi.

Bung 3:18-4:1 sung hihchetna.
T. 18-19na. *“Zite aw, Toupa ah akilawm hun bang zel in na pasalte uh kiang ah kiniamkhiak un. Pasalte aw, na zite uh it unla, alak uah hanhat kei un.”*

Paul in **t. 18na** ah zite’ mohpuakna toh kisai in

“**kiniamkhiak**” chih thumal hon zang hi. Huai tuh zite’n ah amau’ deihtelna zang a pasalte uh thupizaw bang a a ngaihtuah ua, a pasalte uh thu zui di’a thupukna a bawl ding uh genna ahi. Himahleh, haii kiniamkhiatna in ah dinmun leh hihna a zite niamzaw uh

achihna hituan lou hi. Ahihle, pasalte'n a gen peuhmah uh asia-apha hileh zite'n ah a zuih ding uh chihna ahi diam? Hiai dan a theihbuaina a omlouhna ding in Paul in **"Toupa ah a kilawm"** chih thuvual hon zang hi. Huai tuh Toupa mitmuh a thil kilawmte peuhmah sem di'a a pasalte uh thu a a-om ding uh chihna ahi.

Paul in **t. 19na** ah pasalte' mohpuakna hon sumzom a, huai toh kisai in "it" chih thumal hon zang masa hi. Paul in "agape itna" thumal a zat Chiang in "Khrist in saptuamte a di'a mulkimhuaitak a a thuakna" pen a gennop ahi gige hi. Khamuang leh bittak a zite a om theihna ding ua pasalte'n ah sih tanpha a thuak a poimoh hun a leng zite a di'a a kipumpiak ngam ding uh ahihdan a genna ahi. Huai "agape itna" sung ah zite hoihlouhna zong a phunphun chihte omlou ding ahihman in Paul in "hanhat kei un" chi'n hon sunzom hi. Phunna, hanghatna leh ki-iplahna chihte "angmasial itna" akipan hi uhi.

Greek leh Judate' tawndan ah numeite'n pianken in dinmun

niamzaw hihna nei ua, pasalte'n thuneihna tengteng tawi uhi. Huai tawndan zui a khanglian gingthakte'n ah akhanletpih uh lungput pen khek thei pahlou uh hikha ding hi. Huaiziak in, Paul in **t. 18-19na** sung ah *zi-le-pasal* hihna a a mohpuaknate tungtawn a Pathian a pahtawi ding uh a poimoh pen ahihdan a sinsakna ahi.

T. 20-21na: "Naupangte aw bangkim ah na nu uleh na pate uh *thu mang un*, huai tuh **Toupa** pahtak lam ahi. *Pate aw, na tate uh hihnuak kei un, huchi lou in zaw alunglel kha ding uhi.*"

Paul in *zi-le-pasal* hihna a mohpuaknate a hon gen khit in, **t. 20-21na** ah naupangte leh pate kizopna toh kisai ah thupiak khat tuak leh a gah khat tuak hon gen sunzom hi.

Amasa in, Paul in **t. 20na** ah "naupangte" chih thumal hon zang a, huai tuh "*nu-le-pate kepna nuai a omlai, ta piching nailoute*" genna ahi. Huai naupangte' mohpuakna toh kisai a "*thu mang un*" chih ah naupangte' deihtelna kigen kei a, thil bangkim ah a nu-le-pate uh thu a mang ding uh

chih ahi. Hiai ah leng Paul in **“Toupa”** chih thumal hon zang nawn a, huai tuh naupangte’n leng thumanna tungtawn a van a Toupa a pahtawi ding uh Paul in a ngim ahi.

Nihna ah, Paul in pate’ mohpuakna toh kisai in *“na tate uh hihnuak kei un”* chih thuvual hon zang hi. Huai tuh *“demdem a hehsak louh ding”* ahihke’h *“ningkiteltak a omsak louh ding”* chihna ahi. Pate’n ah tate khankhiatna ding a Pathian limsakna toh kithuah innsung bouruak nuam a bawl ding uh Paul in a deih ahi. Baan ah, tate’ lungsim paibuai thei ahihdan genna in Paul in *“lunglel”* chih thumal hon zang hi. Huai tuh *“thuman utna nei nawnlou”* ahihke’h *“thangpaih pan”* a om thei uh chihna ahi.

Naupangte’ mohpuakna leh pate’ mohpuakna a kiton a a paikhawm a, amaute kizopna tungtawn a Pathian pahtawi a a-om ding tuh Paul in a deih ahi.

Bung 3:22-4:1na *“Sikhate aw, sa a na heutute uh thu bangkim ah mang un...Heutute aw, nou leng van ah heupa na neih thei in, na sikhate uh tung ah adik atang leh akilawm hih un.*

Paul in sikhate a hanthawwna **t. 22-25na** sung ah kimu hi. Sikhate dinmun toh kisai Paul in awlmohna lianpi nei hi ding ahihman in, amaute hanthawwna in **tang 4** sung mahmah hon uapsak hi. Hiai hanthawwna a gelh hun in a kiang ah Onesima leng om ding hi. Amah tuh Kolossa khua a gingu Philemon’ inn akipan taikhia ahi.

Paul in **t. 22na** ah sikhate’ mohpuakna toh kisai in *“thumanna”* thumal hon zang hi. Hiai a *“thumanna”* thumal panpihtu ding in Paul in *“Toupa kihta kawm in”* leh *“Khrist nasem”* chihte hon zang hi. Gingu sikhate’n ah hiai leitung ah heutu nei mahle uh, a heutu taktak uh Khrist Toupa ahihdan a phawk ua, a nna uh kilawptak a asep ding uh tuh Paul in a sinsak nop ahi. Baan ah, gingu sikhate’n ah Toupa kihta kawm in leh lungtang a ginomtak in a nna uh sem le uh, mihingte akipan gouluah ding lametna a om louh hang a, Toupa akipan kipahman mu ding uh ahihdan leng Paul in sinsak hi.

Huan ah, Paul in sikhate toh kisai a gen khit in, **bung 4:1na**

ah heutate toh kisai sinsakna hon sunzom hi. Heutate toh kisai in “*van a heupa*” leh “*adik atang leh akilawm*” chihte Paul in zang hi. Heutu kichite’n leng van a amaute heupa nei ahihdan uh a phawk ua, a sikhate uh tung a vai ahawm dan uh tungtawn a Pathian in amaute tung a thukhenna bawl ding ahihdan Paul in a sinsak nop ahi. Huaiziak in, A sikhate uh a ding in heutu himahle uh, amaute leng Pathian a di’a sikha hiveve ahihman un, a nasep dan ua a pilvan mahmah ding uh kizam chihna ahi.

Thukhitna:

1. *Zi-le-pasal kizopna akipan sinlai:* I Laisiangthoubulsuutna sung a “**zite aw**” kichi ahihna bangbang a a thumal let ding hilehang “*nou numei, pasal neikhinsate aw*” chihna hi ding hi. Toup’a’n achiil akipan nupa ding a numei leh pasal mah teel ahihdan kilang hi. Huan ah, i Laisiangthou in numei tengteng pasalte kiang a kiniamkhiak ding in phuut kei a, gingu numeite a pasalte uh kiang ah kiniamkhiak ding in thu pia hi. Huai tuh phutluh hilou in, zite’n ah Pathian a limsakna uh

tungtawn a amau deihtelna zang a akiniamkhiak ding uh chih ahi. Hiai kiniamkhiatna pen zite a ding in nuainunna hilou in hamphatna ahi. Bang chidan in eita? I Laisiangthou in Pasal tuh zite’ lutang chi’n gen hi. Lutang in mahni kimangngilhna, kihumbitna leh panpihtu hihna gen hi. Huai tuh Pasal in amah sang a a zi a ngaihpoimoh zawk a, a angung a bittak leh khamuangtak a a-om theihna ding a a zi a di’a akipumpiak ding chihna ahi. Khrist in saptuam a it bang a pasal in zi it hileh zi a ding in kiniamkhiatna kichi thil manpha leh tanvou thupi ahihdan kilang ding hi.

2. *Naupangte leh nu-le-pate kizopna akipan sinlai:* I Laisiangthou in naupangte tuh nu-le-pate thupiak mang ding in hon sinsak hi. A thupiak khauhdan tuh “*bangkim ah*” chihleh “*mang ngeingei ding*” chih ahi. Huai tuh ut leh utlouh gen lou a hunteng leh thilteng a nu-le-pate thupiak zuih ding chihna ahi. Naupangte tung a Pathian’ thupiak khauh lua hilou ding a diam? Hilou e. Ei nu-le-pate’n ah van a Pathian lauhna toh itna a kizeem

innsung bouruak nuam bawl lehng, tate a ding in thumanna kichi thuhak hilou in, tanvou manpha ahihna kilang ding hi.

3. *Sikha leh heutu kizopna akipan sinlai*: Ei khristiante lak ah *neekguukna, sepna mun a om peihlouna, leh thadahna* tam mahmah hi. Gingtute nasep ding dan (*christian work ethics*) i Laisiangthou in hon sinsakte i theihlounh ziaak uh hi ding hi. **Government, NGOs, Private leh mimal** nuai a nna tuamtuam i septe Toupa'n hon piak ahihdan leh a nna neitu van a Pathian ahihdan i pom a, ginomtak a Toupa kihta kawm a i sep ding i Laisiangthou deihdan ahi. Huan ah, heutu dinmun len a mite tung a vaihawmtu a omte'n leng, i tung a heutu Pathian om ahi chih phawk a kithupisak hetlou a i sep ding uh ahihdan i mu hi.

I Laisiangthou bulsuutna **3:18-4:1** sung ah Paul in "**Toupa**" chih thumal tamveipi hon zang hi. Khristian innkuan sung a *sikhate, tate, zite leh pasalte'n* ah amasapen a akoih ding uh tuh van a Pathian ahihdan genna ahi. Huai tuh

innkuan sung a mimal khat-le-khat kizopnate tungtawn a Pathian pahtawi a a-om ding ahi. Baan ah, gingtute'n ah sep-le-bawl i neihte uh Toupa' nna i sepna uh pulpit i hihsak ngeingei ding chih tuh Paul in a gentup ahi.

Toupa'n simtute hon vualzawl hen aw!

Laibu ette:

1. Dunn, James D.G. *The New International Greek Testament Commentary: The Epistle to the Colossians and to Philemon*. Grand Rapids, MI: The Paternoster Press, 1996.
 2. Geisler, Norman L. "Colossians." *The Bible Knowledge Commentary: New Testament*. Eds. John F. Walvoord, Roy B. Zuck. Colorado Springs, CO: Cook communications Ministries, 2004.
 3. Hendriksen, William. *Baker New Testament Commentary: Expositions of Colossians and Philemon*. Grand Rapids, MI: Baker Books, 1964.
 4. MacArthur, John. *The MacArthur New Testament Commentary: Colossians*. Chicago: Moody Press, 1992.
- O' Brien, Peter T. *Word Biblical Commentary Volume 44: Colossians, Philemon*. Waco, TX: Word Books, 1982. ■



Gammial Aw

Amasa in Gammial Aw simtute tengteng i Toupa leh Hondampa Jesu Khrist min in chibai aw. Kumbul apan i kalsuannate a kallak in haksatna neuhneuh phutkhak ding om bang in honglang zel mahleh kumtawp kuantan bang melmu thei ding leh Agam na i sepna a kalsuanthei lai ding a tudong honpi i biak Pathian thupina i pia hi. Toupa'n kumkhat sung a Field tungtawn a i kalsuannate ah gingthak, baptisna tangthak leh thilpiak chituamtuam a pangthak tampi hon piakte ziak in kipahhuai i sa mahmah hi. A misiangthoute thumna leh thilpiakte thawnlou ahildan muh theih a hong om zel ahihman in thupi i sa hi. Tua ahihman in, hongtung ding kumthak ah thathak la nawn a, kisuuk a tamsem khamangthangte Jesu Khrist khebul a pilut kum ahitheihna ding a panla nawn ding in i kichial hi. Toupa'n field tungtawn a i sepna a gah hon piakte leh kalsuanna khenkhatte hiai anuai a bang in enkhawm nawn ni. Khristmas leh kumthakte khamuang leh kipaktak a zangthei ding in Toupa'n hon ompih chiat hen aw.

A. HIMALAYAN MISSIONS FIELD

KIPATHU GENNA LEH THUMNA DINGTE:

1. Toupa'n gingthak mi nih (*Haldibari-1 leh Pathari-1*) leh baptisna tangthak mi kua 9 (Chyangthapu -2, Haldibari-1, Tunibote-1, Sangratar-2) hon piaknawnte ziak in kipathu gen ni. Gingthak leh baptisna tangthak te khalam a kalsuanna ding uh thumpih ni.
2. Jorethang Station ah Naupang lam Sunday school pat a omtheita ahihman in kipathu gen ni. Sunday skul tungtawn a naupangte lak a Pathian thu leh la a kisinsakna manpha hong hihna ding in thum ni. Ban ah, Jorethang saptuam in kikhopna ding mun lianzaw poimoh ahihman un, Toupa kiang ah mun hoih zaw ngen in thumpih ni.
3. Semtute'n khovel buaina tuamtuam lak a hihbuaitu omlou a lamzangtak a semzom thei ahihman un kipathu gen ni. Pathian ompihna tang a gahsuah leh lohching a hon sepzom zel theihna ding un leng thumpih ni.

4. Field a Toupa gamna sem a i kalsuannate tungtawn a a hunhun a khamangthangte hotdamna huangsung a pilut theih ding om zelte ziaak in kipahtu gen ni.
5. Evan B Kaisuanlal leh a inkuante, OTI, Tamil Nadu a khaguk sung training ding in October 2023 in kuenta uhi. Amaute'n a training uh lamzang leh lohchingtak a hon zoh ua, a sinkhiak bangbangte uh field a manpha a hon zat theihna ding un thumpih ni.
6. Semtute'n tangthupha a genna uh tungtawn a houlimpih khak a neih mite un a lungsim ua khasiangthou in na hon sep a, Jesu Khrist hondampa ding a hon santheihna ding un thumpih ni.

B. DHEMAJI MISSIONS FIELD

KIPAHTHU GENNA LEH THUMNA DINGTE:

1. Semtute'n Toupa ompina toh lamzangtak a amau station chiat a semzom theizel ahihman un kipahtu gen ni. Pathian khasiangthou in semtute a thop a, A deihna bang a kal hon suanzel theihna ding un thumpih ni.
2. Field a Study Centre i neihte leng Pathian ompihna toh lamzangtak a paithei zel ahihman in kipahtu gen ni. Sinsaktu a pang semtute leh sintu naupangte Pathian ompihna ngetsak ni.
3. Semtute'n gingtute toh biakkhawmna buaina omlou a lamzang leh manphatak a neitheih zel ahihman un kipahtu gen ni. Namgharia mun ah leng zankhovak thumna lohchingtak a saitheih ahihman un manpha i sa hi.
4. Buaina leh haksatna tampi kal ah awlmohna liantak toh Director of Mission leh Mission Coordinator in Field vehna November 03, 2023 a va neih un field a semtute nasatak a hanthawn a om uh ahihman un kipak mahmah uhi.
5. Field Khawmpi a 5veina October 22, 2023 in Mounghang Hotel, Dhemaji ah **"Pathian Limsakna" 1 Timothy 6:6** chih thupi pansan in neih in om hi. Hiai hun in thugentu in Rev T Paununsang, Field Superintendent pang a, thu leh la a kitaitehna leng semtute makaihna in om hi. Khawmpi hun in mipi 350 vel paikhawm theih ua, nuam leh lohchingtak a khawmpi zatzoh a om theih ahihman in manpha i sa hi.

6. Garpara a i sepna mun a om Mrs Sumi Pegu leh Mr Papu Pegu te a ginna tungtawn ua hotdam a hong hih theihna ding uh leh Mr Rahul Pegu lungsim lam buaina nei a hong dam a, Jesu Khrist hondampa a hon san theihna ding in thum ni.
7. Namgharia a om Mr Matar Pegu te nupa i semtute'n Pathian thu a houlimpihna vanei thei zel uhi. Pathian kha ompihna toh hotdam a hong hihtheihna ding un thumpih ni.
8. Semtute'n maban ah gingu saptuamte lak ah sinsakna tuamtuam leh seminar saisawm uhi. Bangmah buaina omlou a sai ahih a, lohching leh gahsuah a hihna ding in thum ni.
9. Study Centre i neihte manpha sem a zat a hong hihna ding in thum ni. Semtute'n hih dingdan hoihsem hon muhkhiak ua, hon septheihna ding un Pathian apan pilna leh theihsiamna ngetsak ni. Lachangaon a Study Centre ding bawlina paileng buaina omlou a lamzangtak a zoh ahihna ding in thum ni.

C. MANIPUR MISSIONS FIELD

KIPATHU GENNA LEH THUMNA DINGTE:

1. Manipur Missions Field in a 20th Field Annual Business Conference October 21, 2023 in St Paul Retreat Centre, Mantripukhri, Imphal ah buaina leh daltu bangmah omlou in zangzou thei uhi. Khawmpi hun in Assistant Field Superintendent ding telna ah Pastor Kh Manglemba Singh telching in om a, Khawmpi 2024 Ulian ding telna ah Toupa'n vaihawm heutu ding Elder M Shyam, Elder L Yaiskul, Lic. Pastor P Anand leh Pastor S Debante hon piak ziak in kipahtu gen ni. Telching thak a omte'n a mohpuakna chiat uh hoihtak a hon septheihna ding un thumpih ni.
2. A 12veina Field BDC Kumsim Khawmpi October 14, 2023 in Thamnapokpi ah lamzangtak a zatzoh in omta hi. Hiai khawmpi ah Evan Y Prembala leh Evan Th Priya te'n "Kon paisan kei ding" Diut. 31:6 chih thupi a nei in thutak genna hun manphatak zang uhi. Khawmpi hun in palai mi 70 vel paikhawmthei ua manpha i sa hi.
3. Semtu Missionary-te'n October 30, 2023 in Nambol ah Pastor Kh Manglemba Singh inn ah Workers' Fellowship lamzang leh

lohchingtak a neizou thei ahihman un kipahhuai i sa hi. Toupa'n semtute buaina khawktak lak a akepbiz zelna ding in thumpih ni.

4. Field a semtu station nusete a postingna mun ua kiknawn ding in kisa himahle uh buaina hong kipatnawn man in alutkik nawn ding uh lauhuai thei dinmun a om ahihziak in dinkhawl thak uhi. Thumna tampi toh i semtute delhzui zel poimoh i sa hi.
5. Mr Robindro Singh, MEBCC Langol a Local Secretary a zi toh singtangmite toh kithuzak a thu pesawntu a pang chi a ngoh a om in, a nupa ua vuak leh soisak in om uhi. A soisakna uh a serious ziak in Mr Robindro Singh, Shija Hospital ah ICU ah admit in om hi. A vuakna un a kal (Kidney) sukha ahihman in zun leng thatheilou in om hi. Toupa'n a hihdamna khut a hon hihdamsakna ding in thumpih ni.
6. Gam buaina ziak a haksatna thuak semtute leh gingtute ginna ze-etna hun a ding uh ahihman un lungkia leh ginna taisan mailou a Toupa a dia a hong dinkip ngamna ding un thumpih ni.

D. HOJAI MISSIONS FIELD

KIPATHU GENNA LEH THUMNA DINGTE:

1. Mainapathar, Hojai a Home tuition semtute tungtawn a i sepna lamzangtak in paizom thei zel hi. Naupangte lakah lai hihna leh Laisiangthou thu sinsakna leng neihipih theih a om zel ahihman in kipahhuai i sa hi. Tuition tungtawn a i tup ahihleleh naupangte laihih a, tua kawmkawm a tanchinhoih chii tuh ding chih ahihman in thumna toh semtute delhzui in, naupang nu leh pate leng houlimpih zel ahihna tungtawn ua gag kipahhuai muh hong hihna ding in thum ni.
2. Semtute'n thumkhawmna leh kithuahkhawmna ban ah damloute thumsakna a hunhun a neitheih zel ahihman un manpha i sa hi. Hiai hunte ah paikhawmte apan sharing leh gingthakte apan testimony genna hun chihte a zangtheih zel ahihman un kipahhuai i sa hi.

E. DIMA HASAO MISSIONS FIELD

KIPATHU GENNA LEH THUMNA DINGTE:

1. Semtute tangthupha tangkoupih a houlimpih theih ding mi piak a om zel ahihman un kipathu gen ni. Houlimpih khak a

omzelte'n tangthupha tungtawn a hotdamna hon ngah theihna ding un thumpih ni. Damlou damdawi in a omte leh damlou ompihthe kiang a semtute'n Pathian thu a gen zelte uh tungtawn a azamite lungsim a khasiangthou in nna hon sep a Jesu Khrist hondampa ding a hon santheihna ding un thumpih ni.

2. Semtute'n kalkhat a ni nga sung Tuiton Centre mun ah naupangte lai hilh in, kiginni teng in Pathian thu le laate sinsakna neithez zel uhi. Tuiton Centre kim leh kiang a khua omte leng a vangkim in phathez zel ua, tua banah naupang nu leh pate kiang ah leng vakzel in houlimpih theih ding mi lemtang omte houlimpihna nei zel uhi. Semtute kalsuanna hong gahsuahna ding in thumna tampi toh delhzui zel ni.
3. Kolabari khua a naupangte lak a tuiton tungtawn a Pathian gamna i sepna naupangte leng kibehlap tou zel in, pai hoih tou zel hi. Pathian thu leh laa leh tangthu tuamtuam sinsakna tungtawn a naupangte lak a tangthupha chi a hong kituhna ding in thumzom zel ni.
4. Dimasa namte ban ah agam mite itna leh awlmohna ziaak a semtute'n a kalsuan zelnate uh thawnlou a gah kipahhuaitak muh hong hih theihna ding in thum ni.

F. GOALPARA MISSIONS FIELD

KIPATHU GENNA LEH THUMNA DINGTE:

1. Naupangte lak a semtute'n siamsinna tungtawn a nasepna a neih uh field dangte mah bang in paihoih tou zel in, tuni chiang in a vangkim in naupang kibehlap tou thei zel hi. Siamsinna tungtawn a Pathian thutak puanzak ding tuppipen ahihman in thumna ah delhzui zel ni.
2. Semtute'n a tate uh khalam dinmun awlmohna leh veina toh Hotdamna Camp October 21-22, 2023 sung manphatak in zang uhi. Hiai hun a semtute mah thugentu in pang in khelhna, kisikna leh ngaihdamna ban ah hotdamna kitheihchetna thute sinsak uhi. Camp tungtawn a hotdamna toh kisai a kitheihchetna nei om uh ahihman un kipahtu genkawm in maban ah khalama a hong khansemsem theihna ding un thumpih ni.
3. Semtute'n khalam leh salam kihanthawntuahna ding ngimna in kalkhat in khatvei Prayer fellowship neikhawm zel uhi. Hiai

hun in thupi tuamtuam kikupkhawmna leh maban kalsuan ding dan genkhawmna neithez zel ahihman un manpha i sa hi.

4. October 23, 2023 in TBMC, Guwahati in semtute vehna vanei uhi. Hiai hun ah semtute thumanpha tampi toh amaute hanthawmna leh thilpiak piakna vanei ua, ankuang leng sawkkhawmpih ngal uhi. Hiai bang field in vehtu a neih field a semtute kipakpetmah uhi.
5. Mr. Bhatika Rabha pianna nu Anando Bazar, Goalpara leh Mr. Suman Rabha Hathishila-te damlounhna ziaik in a gammite khat makaihna toh semtute'n Pathian thu genpihna leh thumsakna hun vazatpih thei uhi. Thumsak a omte hong damsianh ua, Jesu Khrist thu tamsem theihbeh a, hon lunggulh semna ding un thum ni. Mr Nabakumar Rabha, Hathigao khua a om leng houlimpih theih leh lunglutna chiang nei mahleh a khosung kivaipuakna uh society khauhziak in deihbang a hangsan zou tatak lou ahihman in thumpih ni.

G. KAMRUP DISTRICT A SEPNA DINMUN

KIPATHU GENNA LEH THUMNA DINGTE:

1. Chaigoan Area a semtu Evan Kaplun Paite in Lampara, Chatabari, Jambari, Amtola gaon khuate vehna nei thei hi. Hiai hun ah amaute toh kimeltheihtuahna bang nei in, taksa hatlou leh om nuamlou hi a kitheite BP check sak zel uhi. Hiai hun lemtang a la in amaute toh houlimna neithez zel uhi. Semtute'n hihtheihtawp suah uh ahihman in lohching a gah kipahhuaitak muh a hihna ding in Toupa kiang ah thum in ngen ni.
2. Lohargat Area a semtu Evan M Daizachin in meltheihsa a neihte inn vehna leh mi bangzah hiamte houlimpihna neithez hi. Mr Robin Rabhate nupa gingtu hisa leh gingtu hinailou anu leh anaute kikal a kitheihsiamlounhna omte va houlimpih in kilemna va bawlsak in thumsakna vazangthei ahihman in manpha i sa hi. Mr. Robin Rabha te nupa mite adia ettontak leh Khrist mel langsaktu a hong hih theihna ding un thumsak ni.
3. Pathian in semtute leh a innkuanpihte uh A vanzat manpha tak a hong zat sak a, a omdante uh Khrist mel langsaktute hong hih theih gigena ding un thumsak ni. ■



DORCAS *Corner*

Pathian hoihna leh chitnate ziak in kumtawp kha December-2023 muthei tan a hunpha piak a i omman in kipahhuai i sa hi. Khovel gal buaina lak ah kepbit in i om a, hunte hong kihei lamdang zel in phalbi huihvot in hon mut a, Khristmas hun galdot thei a hon pi Toupa Jesu Khrist min in simtute Khistmas chibai aw!

“...Laukei un, k'on tanta hi; na min un k'on sam a, kei a na hi uhi. Kei Toupa na Pathian uh, Israelte Mi Siangthou, nou hon humbitpa ka hi ngal a...Ka ngaih in manpha mahmah na hi ua, mi zahtakhuai mahmah leng na hi uhi, it leng ka hon it ziak in, na sik un mite ka pe ding a, na hinna sik ding un michih ka pe ding hi” Isai 43:1-4. Hiai Laisiangthou thute'n Pathian limsak teitei a hinkhua zang ding in hon hatsak leh i chi mahmah hi.

Pathian limsak a hamphathuai dan: Angel Gabriel in Mari kiang ah, “Chibai, nang nakpitak a deihtuam: Toupa na kiang ah a om” a chi hi (Luke 2:28). Mi hampha i chihte tuh deihsak tuam/bik a omte ahi. Mari, numei sapsap ding in Hondampa Khrist pianna Nu ding a teltuam ahih nak hamphat lotel hi. Kristian gingtute tuabang hamphatna tangte i hi uh. Jesu Khrist ziak a khalam hamphatna tang a hinpihte i hi. Mihing a piangkha, vualzawlna tuamtuum Pathian a kipan in lamkhat leh adang khat ah kidong chiat hi. Huchibang a i khosak touh lai in Pathian limsak a hamphathuai dan leh a manphatna phawk khalou a, mahni ut dandan a hinkhua zang a lungkhamna tampi tuahloh a khosak khak maimah theih ahi. Himahleh a lehlam ah Pathian limsak a a hon itna leh ngaihdamna tangte ading in hamphatna thupitak kitang a, tua hamphatna i tan chiang in Khrist ading in hinkhua manpha kizangthei lel hi. Bible in Pathian limsak a hamphathuai dan a gen tuh tulel a i damsung kia a ding a hikei a, hinkhua hong paitou zel ding a phatuam ahi. Pathian limsak punna ahi a, hamphatna tampi tunkha in sum leh pai, neih leh lam hauhna leng hontun hi. Paul in, “Himahleh Pathian zahlouhna leh tangthu bulbal neiloute deihken. Pathian limsak

ding in kithuzoh in; Sapum kithuzohna a phatuam zek a; Pathian limsakna pen tangtawn in tua omsa hinna leh hong omnawn ding piak chiamna a neihziak in thil tengteng ah a phatuam hi. Mi tengteng kiang a na phattuamna a lattheihna ding in huai thilte ah thanuam inla, kizang zou in” chi hi (I Tim.4:7-8,15). Pathian ading a i hin chiang in ei mahmah hinkhua ah chituamna lam tuamtuam - nekzonna, inkuan sung, sum leh pai zekna leh damtheihna ah muhtheih hi. Pathian limsakna thil tengteng a phatuam a punna ahihna ahi a, tuamah ei ading a hamphatna thupi a hi.

Pathian limsak a manphatna: I limsak ding pa Pathian toh kizopna kichian neiloute ading in Pathian limsak a manphatna kichi hinpih khatheilou ding uhi. Sapum kithuzohna a phatuam zek a; Pathian limsakna pen tangtawn in tua omsa hinna leh hong omnawn ding piak chiamna a neih ziak in thil tengteng ah a phatuam hi, chi hi(1Tim.4:8). Huai in tuh tangtawn ading a manphatna hon tun chihna ahi. Lau a omnawn ding in sikha hihna kha na tang uh ahi ngal kei a; ta hihna kha na tang uh a hizaw. “Abba, Pa!” chi a i kikou chiang in, Kha mahmah in, eimah kha toh, Pathian tate i hi chih hon theisak hi; Huan tate i hihleh gouluahpihte i hi uhi; Pathian gouluahte, Khrist luahpihte i hi ua; a kiang a pahtawi a i omsam theihna ding a amah i thuakpih taktak leh (Romte 8:15-17). Pathian limsakna in ta hihna leh gouluahpihtu hihna hon pia hi. Tuamah ahi, Pathian limsakna in tangtawn a hinna manpha hon piak, Paul in Timothy kiang a a gen. Pathian limsakna ziak in i hinkhua a poimoh bangkim piak in i om a, huaimah ah theihtawp suah in ginna hih bukimna in itna, mahni kithununna, midangte toh kal a hoihna suahkhia in Pathian thilhihtheihna tungtawn in Amah omdan kikoppih thei in i om hi. Huchi in hotdam kitheihnelna a khang in maban hinkhua a kipahman sangzaw manoh in lametna toh kal kisuan hi. Amah thupina leh hoihna ziak a honsampa, a tanchin theih ziak in a Pathian thilhihtheihna in hinna leh Pathian limsakna lamthu ah thil tengteng a hon peta hi. Huaite ziak in a thuchiam mahphatak leh thupi mahmahte a hon pia hi; huchiin utna ziak a khovel a siatna hong om taikhiak san in; huai thuchiam manphatak leh thupi mahmahte ziak in Pathian omdan na kikoppih sam ding uhi (2Pet.1:3-4). Pathian hehpihna ziak a ginna tungtawn a hotdam a

om i hi, eimah a suak a hikei a, Pathian thilthawnpiak liauliau ahi. Huaiziakin Pathian limsak hamphatpih a a manphatna tang chiat ding in Toupan hon vualzawl hen.

DORCED HUHNA: EBCC, New Lane Bungmual TBDC leh EBCC Hebron a TBDC leh V Vungzamawi, EBCC Zion te'n DORCED huhna in in Rs 10000/-, Rs 5000/- leh Rs. 500/- tuak pia uhi. Petute Toupan tamsem in Vualzawl hen. ■



YOUTH *Corner*

LEMNA LAL

Matthai 1:23. Ngai in, nungak siangthou a gai dia, tapa a nei dia, a min ding in Immanuel a sa ding uh, chi a na gen ahongtun theihna ding in huai tengteng tuh a hong om hi. Huai tuh, i kiang uah, Pathian a om, chihna ahi.

Pathian hehpihna ziak in Khristmas leh Kum thak hunpitemaituah ding dinmun ah i omta a i kipak mahmah hi. Midang khenkhat ading in hehna, thangpaihna leh mi toh kisiat kum ahi maithei. Mi khenkhatte ading in lah tukum damlounhna kum, lohsapna kum ahi kha ding. A khente ading in lohchinna kum ahi maithei. Bangteng hileh Toupa hoihna ziak in hiaitan i tungta; mi hoih leh mi hoihloute tung a akibang-a ni sa sak a, vuah leng zusak zel Pathian min i phat hi. Huchih lai in nang Khristmas bangchi zat na sawm a? Khovel in kilemna a poimoh ziak in Pathian in a Tapa '**Kilemna Kumpi**' ding in a hon sawl hi. Mihingte'n Pathian toh kilemna i poimoh a, mihinpihte toh kilemna i poimoh a, thilsiamte toh kilemna leng i poimoh uhi. Aneuzaw in gen leng insung ah kilemna i tasam ua, khotang ah leh gamsung ah lemna leh muanna in mun anei kei deuhdeuh hi. Tualgal leh hiamgamna-te ziak in khovel a pumbuaita. Mi nautangte mahni inn leh mahni gam a leng om ngamlou in bitna zong in khovel ah galtai (refugee) a pumdimta hi. Khovel in kilemna leh muanna lam tuamtuam ah a delh a himahleh muanna sang in kilemlounhna a uang semsem hi.

Mahni nam itna: Mahni nam it a hoih a himahleh namdangte huat a dik kei. Mahni nam itna namdangte huatna dia phalna ahi kei. Tulai tak a US makaite'n a paipih uh "Americans First" kichi a sepzuina uah Mexico toh gamgi a daikaih ding, midangte huhna kiamsak ding tua dia Paris Agreement on Climate Change apan US a kizukkik June 1, 2017, Travel Ban or Muslim Ban, chihte leh EU apan Britain pawtkhiakna January 27, 2017, hiaite'n ideology kibang a share chiat uhi. Nambing kihuai tuamna a khengval a paipih ahieh chiang in gamkhat sung a nam tuamtuamte kihuatna a piangsak hi. Tulai in tumlam ah leng hiai feeling ahat deuhdeuh a asuite muhdan in America ah kum 2000 AD in namdang hopawl (Hate group) 602 a om a, kum 2011 in 1018 in a khangtoug a chi uhi. 2021 in ahiehleh 733 in ke niam mahmah chih ahi. Tuat lak a a tallang deuhte tuh: - Ku Klux Klan, Neo Nazi, White Nationalist, Racist Skinheads, Christian Identity, Neo-Confederate, Black Separatists, General Hate chihte khawng ahi uhi. Midangte huatna vanzat dia sahkhua zatna leng a tamta hi, Saptuamte pilvan huai hi. "Itna ahiehleh lepchiahna tellou in hihen" (Rom 12:9).

Galvan: Thil peuhmah a khengval a akizat chiang in dik ngeilou hi. Galvan zang a minam khat humbit tupna aom chiang in, namdang kuahiamte dou leh thah tupna a suak hi. Mahni nam, mahni gam it luatna ah namdang zodeuhte huatna apiang baih mahmah hi. Huaiziakin, galvan lauhhuai tam semsem i chihte kihuatna leh kimuanmohna asan semsem ziaak ahi. Galvan in muanna tunlou ding hi.

Betdaih Ding: Tulai a mi huham khat Rodrigo Duterte in "Adolf Hitler in Judate tampi a thah bang in damdawi khamtheih hihte thah ka ut" a chi hi. Thil hoihlou hihte tawmchik ahi a that bei suk leng Khovel hong hoih mai dia gingta pawl om hi. Hiai thudik kimkhat ahi. Huai policy zang in Iraq, Egypt, Afghanistan leh adang dang thagum a dou in aom a lemna sang in huatna apiang semsem hi. Tuabang thagum a lemna tunding sawmna ah US in Iraq ah sum \$814.6 billion asengta a, Afghanistan a Taliban-te betdaih a sawmna ah \$685.6 billion a sengta uh chi in misiamte'n gen uhi. Thagum in leng kilemna tun lou ding ahi. Hiaite apan in Jesu Khrist lou in zaw leitung ah lemna leh muanna kiching om ngeilou ding

chih hon musak hi. A khengval a mahni kihuituamna a omna peuh ah buaina a piang zel hi.

Khovel kilemna delh dan leh Pathian kilemna delh dan akibang kei hi. Khovel method bel mahni dik kisakna, midangte moh sakna ahia, Jesu method bel adikna genlou in a sisan in kilemna a bawl hi. Huaiziak in, Saptuam in leng mahni kingainiam a midangte hoih dia phut lou in mahni in kilemna pat ding ahi. Bangmah demand bawl masalou in Bethlehem ah a hong piang a, a dikna gen hetlou in khros ah a hong si hi. Tukum Khristmas Lemna Kumpipa nuai a kitulut thak in Amah adia kilemna vanzatte hichiat ding in leh midangte adia vualzawl na hiding in Pathian in hon vualzawl hen. ■



CHILDREN'S *Corner*

GINGTU LEH SOCIAL MEDIA

1. SOCIAL MEDIA BANG A?: Khovel khang kikheng hattakin mihingte zattheih ding thil thak tamtak ahon pokhia hi. Tua thilte lak ah tulaitak a mite ngaihtuahna, hun leh lunglutna la mahmah tuh SOCIAL MEDIA ahi. Social media i chih tuh tulai khovel vanzatte (digital technology) tungtawn a lungsim a ngaihtuah thilte leh thudang tuamtuum (ideas and informations) - a gelhthoh hiam, a lim/video hiam, midangte muh leh theih dinga baihlam tak a kapkhiak theihna dohkan ahi. Etsakna: Facebook, Whatsapp, Instagram, Twitter, Pinterest, leh a dangdang. Hiai dohkan pen tulai khovel ah dohkan poimoh leh mi tampi in a zat ahi. Huchi bang himah leh Social media in a hoihlam leh hoihlou lam nei ahih man in gingu mikhat ading in a zat dingdan leh zatlough dingdan om ahihman in pilvan huai tak ahi.

2. THUTAK DING: Gingu mikhat in Social media hiam, ahikheileh mun dangdang ah gen-le-sak nei theilou ding chih ahikei a, himahleh gen-le-sak i neih ding leh, Laisiangthou in hon sinsak, lungsim a theih ding poimoh mahmah om hi. Laisiangthou in “*Mi kuapeuh in thu a gen leh Pathian thute bangin gen hen*”

[1 Peter 4:11] chi hi. Pathian thu kichi thutak ahi a, Pathian thu sungah zuau kichi himhim in mun neilou hi. [2Peter 1:19-21]. Huai thutakna tuh Pathian mite'n i kepbit ding ahi. Tua ahih man in gingu khat in koipeuh ah zuau thu hiam, thu dikloupi hiam, gentu leh thehzak tu a apan ding hilou chihna ahi. Tulai in social media, Whatsapp, Facebook, leh adang adang te ah thuzuau nakpitak in ki thehzak hi. Thuzuau leh thudiklou thehzaktu ahihkeileh pesawntu a i pan khak ding kiven huai mahmah hi.

2.1 PILVAN DING: Tua banah i Laisiangthou in *“na hihpeuhmah uh, Pathian thupina ding ngen in hih un”* chi hi. [1 Kor. 10:31]. *“Hiai gen/gelh leng Pathian min thupi pahtawi in a om diam?”* chih ki dot masak kul chihna ahi. Thil teng ban gen zezul a, Pathian min daina ding leh midangte lungsim su na thei peuh genkhak baihlam ahih manin social media platform zatna ah pilvan huai mahmah hi. Laisiangthou in *“Pilvang unla, limsak un; na melma uh Diabol, humpinelkai humham bang in a nek theih ding zong in a vialvak hi”* [1 Peter 5:8] chi hi. Tulai a i zat naak mahmah social media khenkhatte zat didan leh pilvanna ding tamlou i en ding.

2.2 WHATSAPP/FACEBOOK GROUP(S): I kim i kiang, gamsung, Saptuam leh khotang banah khovel thute tanpha i theihna ding a poimoh mahmah tuh group chat ahi. Group chat te in thuthak tampi hon theisak in, thu poimoh baihlamtak a mi tampi kiangah kizaksakna ding inleng phatuam mahmah hi. Lungsim a ngaihtuah thilte leng piakkhiak theih a, midangte thugelhte apan in leng ngaihdan va kup theih hi. Pilvan huai tuh, thutak hia, thuzuau hia chih leng ngaihtuah manlou a, lungsim a hong pawt peuhmah pawng kapkhiak in thil tampi suse thei ahihdan phawk ding ahi. Tua banah group min leh a kibawl na sante Chiangtak a thei in, thukup hiam ngaihdan hiam neih a poimoh hi. Group min leh akibawl nasan toh kituak hetloupi a thuvek kichi haihuai ahi. Banah, gingu khat in ama telna ding leh tellouhna ding group te zong chiantak a theih ding a poimoh a, zahmoh leh thanguai taktak thu leh lim te khong kikupna groupte a tellouh ding ahi. Salam leh khalam a hon lamtou thei ding groupte a kihel a hoih in a phatuam hi.

2.3 YOUTUBE LIKES, SUBSCRIBE AND SHARE: Mi kuahiam in thuhoih/lahoih a hon post leh, Like, Share leh Subscribe kichite bawlsak kichi thilhoih ahi. Huchi bang thilhih in, a post tute' lam chi tuamtuam ah panpih thei hi. Tua kia hilou in, website lam apan feeder bawltute'n leng na lunglutna (likes) ana thei uh ahihman in, na lunglutna lamte nangmah muhtheih ding in na wall ah hon tah (feed) tam hiai hiai ding uhi. Pilvan huai ahihna tuh lim/video thanghuai khat nava like chiang in, tahtute'n (feeder) huailam ah hon pilut hiaihiai ding ua, a tawp chiang in zongsatna (addiction) hon tun thei hi. Huaiziakin, lim/video hoihlou, thanghuaite tuh va like/share/subscribe se louh nang ading in a hoih ding a, tahtu (feeder) ten leng ahon tah sese kei ding uhi.

THUKHITNA: Khovel khang kikheng hattak in hiai tan kia hilou in mailam ah leng thil thak tampi hon pokhe lai ding hi. Huaiziakin, huchi bang vanzatte na phattuampih hiam, na siatpih hiam pen nangmah khut kia liuliau ah kinga ahi. Bangteng hileh, Pathian thu sinsak banga na hinkhua na kep intuh, khovel in bangteng hon pokhe mahleh, Pathian thu vak sungah na paina ding chiantak in na mu ding hi. *“Na thu ka khe ading in khawnvak ahi a, ka lampi a ding in vak ahi”* [Sam 119:105]

Report

Plain Area Leadership Seminar:

FEC in Year Plan dia a koih, phaizang leh singtang a khatvei tuak Leadership Seminar NEBC sung a semtute leh local Saptuam heutute toh neihding chih sepsuahna in hun masa Phaizang ah 1st November 2023 in EBCC Birtamode ah neih in om a, Saptuam chih a Local leh Dorca committee ban ah semtute kigawm 120 vel toh zat hi a, Pathian tung ah i kipak mahmah hi.

Hiai hun ah Heutupa Rev K Kamchinkhup, Director of Missions leh Upa T Paukhansiam, Missions Co-ordinator ten *“Ka Belamte Vak in (Johan 21:17)”* chih thupi zang in hon sinsak uhi. Heutute sinsakna apan in, saptuam heutu, makai khat in a kep belamte adinga a hih ding sanga a belamte neitu Pathian tunga a hihding masa a hihlouh

khak ding lauhuai ahihdan hon sinsak ban uah, Pathian belamte neitu leh ittu tunga hih ding bangbang heutu in ahih masak chiang in, a belamte tunga a mohpuakna pen hoihtaka sem thei, vak thei, enkol a ching thei ahihman in, a masa leh a zom dingte a banban a hih heutu hi dinga hasotna zaka omte manpha petmah hi.

Sinsakna hunnih kizang a, hunnih kikal ah special event khat om a, huaibel “blood donation” ahi. Semtute lak a etchetna apan sisan pe thei 28 ten Red Cross society te lak ah unit 28 donote theih ahihman in i kipak mahmah hi. Hun hongpai zel ding a leng khotang adia na hoihsep zom zel kisawm hi.

Mailam hun a singtang area a hiaibang hunpi zat ahihtheih nading in, simtuten honna thumpih un aw. I kalsuanna sate uh ziakin Toupan thupina tang ta hen.

Agam adia na seppih uh,

- Rev Dr Thangminlun Mangte

Field Superintendent, Himalayan Missions Field



Join Church Fellowship Hotdamna Camp:

Thupi: Joshua 5: 9 “noute minsiatna ka zialkhia hi”

Ahun sung : 9th-17th October 2023

Suangdai khosung a saptuam omteng (EBC,CBA,NTBC) kipawlkhawmna Join Church Fellowship Suangdai, saina in apaisa 9th-17th October 2023 sung teng, khamtheih bawlte a diing biikin Hotdamna Camp, G. Suanchinpau gam a om Police Outpost, Campsite ah neih ahi. Apatni nitak 6:00 pm in Camp honna Pastor Chinlamthang, Camp Director in nei in, huai nitak pen Orientation leh kipawlneelna hun leh phatkhawmna hun in kizang hi. Camp thupi Joshua 5:9 “noute minsiatna ka zialkhia hi” chih pansan in Resource persons : Pro Pastor Thangbiakmung, CBA Suangdai, Rev. James Lalpu Hatzaw Regional Director, Northeast Region, Indian Gospel League, leh detoxification cum counselling diing in EBCC pawlpi in ahon sawl LRRC Workers ; Boipu leh Vungkhankhup te pangin nuamtakin zat zoh ahi.

Hiai Camp lohchin theih nadiing in Suangdai khosuak nu thumpawlte Lamka akipan Suangdai ah hong pai in Camp neih sungteng thumna toh naaktakin Suangdai khosung a biakinn omteng ah thumna neikual in ana tosawn den ua, amaute mah in Camp lohchin teitei nading tup a nei in kalkhat sung anngawl thumna nei in panla ua, huchi kawm kawmin Nu Chingngaihlu in Pathian thu toh kho mipite hon vaak in mun nih ah Camp nei mah kibang a, Suangdai khua in khalam ah halhthakna thupitak akitang hi. Amaute in khalam veinatak toh ahon supportna uh thupi in phattham aching mahmah mai a, Camp lohchinna thuguk leng achih theih hi.

Camper 48 pha a, ani masa ni guk (six days) sung vel detoxification leh awareness cum counselling chih paipih a neih a om in, hiai hunsung in camperte leng kibawlhoih ut in hahpan mahmah ua, heutute kipiakzohna leng sang mahmah in naktakin beihpi suah uh a, camperte leng kihong in, kibawlhoih utna leh puakgik liantak aneihte uh Pathian kiang ah sungbua ut in pan naaktakin ala uh chih muhtheih a om in, tawl leh bahsam hunkhop bang om hial uh a, hehpih huai thei mahmah uhi. Himahleh Topa thilbangkim bawltheipa in hatna guan in camperte leh heutute kar ah kineelna leh kichimatna hoihtak hong om in huai in khasiangthou nasepna suhat in naaktakin camperte lak ah halhthakna leh kikheekna thupitak tun hi. Huchin athilchiin hoihloute uh taisan in kibawlhoih ut in, sual thupha tawi in Pathian mai ah kilaan khethei tamtak aom uhi.

Hiai Camp neihna diing ah mun thoveng deuh poimoh ahihna ah amun neitu, heutupa Suanchinpau, Hausapu, in agam sung a om Police Outpost kiphal takin hon zangsak a, akipah huai mahmah hi. Huai banah hiai Camp lohchin theih nadiing a sum leh pai taksapna liantak akineih laiin mi phatuamngai mimal tamtakte leh pawlpite apat panpihna tamtak kimu a, i pankhopnate ziak a camp kizang thei ahihmanin, panpihna hon pe tengteng aleh tampi in Pathianin hon gualzawl leh i chi hi. Panpihna hon pia te tung ah kipathu genna in i taklang ut ua, amaute hiai anuai a bang ahi uhi.

A camp tawpni, 17th October (Sepnawnni) in camp khakna in khosung pumpi huap in Ankuang luina NTBC huang ah kinei a, hausapu pu Pumdou in le Vok khat thoh in khozang mipi in neekkhawm kibawl a, anitak mah in NTBC biakinn mah ah camp khakna programe nuamtak mai kinei in Camp Speaker Pro Pastor Thangbiakmung CBA, in Camperte leh mipite chouna leh hanthonna nuamtak aneih zoh in Camp khakna leh khosung mipi a diing a gualzawl ngetsakna Pastor Chinlamthang NTBC in nei in Camp zoh ahita hi.

Hiai Camp lohchinna diing a, muntuam gamtuam a om uleh nau, thumna leh, sumlehpai thalehzung, a pang kha tengteng aleh tampi in Topan hon vualzawl henla, hiai Camp tungtawn in Suangdai khua leh i gamsung pumpi huap in khasiangthou nasepna tungtawn a Pathian gam keeklet in omta hen chih ka thumna uh ahi. Topan thupina teng tangta hen. Amen !

Kipak ung, Join Church Fellowship Suangdai, min in

Sd/- Pastor Chinlamthang, Camp Director ■

RELIEF SUB-COMMITTEE ACTIVITY

RELIEF PLAN 2023 SEPKHIAKNA

SI	PLAN	GENCHETNA	SEPKHIAKNA	SUM SENZAH
1.	Nektak van kiching omsak ding	Saptuam mi kuamah nektak thite tang banlou a om louh ding	Aizawl apan nektak van Antang bag 2253, Dal- bag 441, Sathau- case 530, etc. laklut & hawmkhiak hita hi.	Rs. 50,00,000/- [Revolving a zat ahi]
2.	Relief Centre Huhna (Nektak van & mimal poimoh vanzatte)	Galtai relief camp a omte nektak van tuamtum & mimal poimoh vanzat taksapna huksak ding	Relief centre 20vel ah nektak van athawn a hawmkhiak kigawm- Antang bag 280, Dal bag 80, Sathau case 103, etc. Mimal vanzat poimoh towel, sahbon, ha-nawtna, diaper, carry bag, hair oil, puansawp sahbon, etc. tamtak hawmkhiak ahi.	Rs. 10,00,000/- vel kisengta hi. Rs. 2,81,627/- val kisengta.
3.	Saptuam mi tasam diakte huhna piak ding	Saptuam mi nek zonna buai ziak a tasam diakte kiang a huhna piak ding	Division quota 3vei hawmkhiak hita. Nektak van hawmkhiakte- Antang bag 1900, Dal bag 360, Sathau case 400 ahi. Aman niam zaw a hawmkhiak ahi.	Rs. 9,50,000/- val kiseng banta hi.
4.	Strategic Relief Action: Thumna leh hanthawwna	Frontline a omte Pathian thu a hanthawwna & thumsakna neih zel ahi	Madawak a duty-te omna mun 20 vel hun tuamtum ah vapha in hanthawwna thumsakna & nektawm van tamtak piak khiaak ahi.	Rs. 3,50,000/- val kisengta hi.
5.	Educational Relief (Nursery-CI-XII)	Buaina ziak a galtai student haksak diakte huhna piak ding	School admission hun ua laibu man & uniform man piaksak inkuan 62 apan naupang 144 pha hi.	Rs. 5,49,900/-
6.	Educational Assistance (College Student)	Buaina ziak a college kaina kisuan NMC sponsor studentte huhna	College Adm. zonna & lampaina Lamka-Aizawl kal siksak mi 35. Saptuam mi 18te sum a huhna tamlou chiat piak ahi.	Rs. 1,47,600/-

6.	Bible Relief	Imphal & akim apan saptuam mi galtait Bible piak ding	CBH ah DS tawn a laktheih dia koih ahi a, inkuan 1 in bu 1 zel. Tutan in inkuan 218 in honglata uhi.	Rs. 2,98,600/-
7.	Medical Assistance to IDPs	Relief Centre a IDPs haksa kholdiakte damlough hun a kepna/huhna	Mimal damlou panpihna piak zah = 18	Rs. 50,240/-
8.	Medical Relief	Buai ziak a liamna tuak hospital & inmun a kikemte huhna, sihna tuakte thuakpihna piak	Hospital a kikem mi 16 & inmun a kikem mi 4, sihna tuak mi 3te sungkuante thuakpihna a piak	Rs. 1,22,863/-
REHABILITATION PLAN 2023 SEPKHIAKNA				
1.	Ginna Kalbi (Inluah a khosa kibulpat ding)	Saptuam mi galtai (sum muhna kichian neilou) relief centre apan inluah a khosa kibulpat utte huhna piak ding	Inluah man kha 6 or March 2023 tan piaksak ding, antang apoimoh hun ua piak zel ding. Tu in inkuan 23 approval piak ahi.	Rs.52,100.00 Kha teng in kipia hi (52,100x6=3,12,600)

Tutan in relief activity nuai ah Saptuam in HQ apan sum Rs.37,81,803.00 val kisengta ding a tuat ahi. Tualsung Saptuamte'n amau hihtheihna tan ah tasamte nektak hukna nasepna nakpitak in sem uhi. Rehabilitation plan sepkhiakna toh kisai in panlakna paitou lellel hi. Galtai tasam diakte inn lamsak ding leh huhna tuamtuam kitundingna dia piak ding sai zomzel ahi. Olive Retreat Centre ah October kha sung in Volunteer-te Gospel camping, Ministries Department saina in neihiph ahi a, mi 588 camp lut uhi. Huai ah camper Bible neilou mi 171 kiang ah Bible a thawn a piak ahi. Camp saina ah Rs. 10 Lakh vel kiseng hi. ■



EBC Innsung Thu

KUMSIM KHAWMPI REPORT:

EBC Mizoram Division Kumsim Khawmpi 43na EBCC Mimbang ah Date 6-8 October, 2023 in kinei a huai hun in thugentu in DS Rev S Thang Johnson, Pastor Khenthang Buansing leh Pastor B Chinkhengoupau; Devotion leh kisinsakna hunte Pastor Pumsuanmung Naulak, Pastor B Paubiaksang leh Pastor Khenthang Buansing ten zang uhi. Hiai khawmpi hun in Kumnawn a Khawmpi Ulian ding telna leh DEC 2024-2026 sung vaipaw ding kitelna leng neih ahi. Khawmpi vaihawm hun in palaiten ankuang leng sawkkhawm ahi. ■

Thu Tuamtuum

1. **Staff Quarters Honna leh Latna:** EBC Missions Centre, Guwahati mun a Quarters bawl a om zoh ahihtoh kiton in a honna leh latna October 28, 2023 zinglam dak 8:00 in Field Coordinator Rev G Thangsanglian in honna leh latna nei hi. Hiai hun in TBUC leh TBMC EBCC Guwahati apan leh Assam Field a semtute toh mi 50 val kipaikhawmthei hi. Quarters zoh ahihtoh kiton in November 03, 2023 ni in Evan Suanboy Vualnam leh a inkuante tenglutta uhi. Missions Centre gahsuaah leh manpha hong hihna ding in thumna toh delhzui zel ni.
2. Assam Field sung a semtute a ding in a khatveina Workers' Fellowship October 28, 2023 in EBCC Guwahati Biakin ah nuamtak leh manphatak a neih in om hi. Hiai hun ah Lead Missionaryte apan report ngaihkhiaakna leh semtute'n maban a kalsuan dingdan uh kikupkhawmna leng nei uhi.

KIPAHTHU GENNA:

EBCC D leikot LSD in Dt.29 Sept.- 1st.Oct. sung "Kongpi Khat Honsa in om hi (Kilakna 21:25)" chih thupi pansan in Chialpina kinei hi. Hiai hun ah nek-le-tak toh kisai haksa diakte khualna in DS EBC Lamka South leh Hausapu Thongkhohau ten anntang bag 2 chiat hon present uhi. Hiai chialpina Pathian Khasiangthou vehna tang in mi tamtak in kitheihchetna leh kilan thak muh ding om hi, amaute lak ah mi 12 ten Bialtu Pastor tungtawn in Dt.22/10/2023 ni in Baptisma tang thei ua kipahhuai lua, Toupa'n thupina tang hen.

- **Upa H Thianmuanthang**, *Secretary TBUC EBCC D LEIKOT* ■

ACTIVA LEISAK:

Pa N Thangzachin, Elim Veng, New Lamka in a nu "Pipi Teresa Trust" min in Dhemaaji Missions Field Office a zat ding in Activa thak hon leisak hi. Nisim 2nd November 2023 in Rev. K Kamchinkhup, Director of Missions in Field Office mun ah latna nei hi.



Toupa'n tamsem in vualzawl hen. ■



Ordain Sunna

1. Min: **Upa K. NGULZATHANG**
2. Pianni: 15th July, 1952
3. Pianna Khua: Mimbung
4. Pianthak Hun: January 1991
5. Baptisma: 1967, Baptistu: Pastor Khawizachin
6. Pa Min: (L) Pa Songchin
7. Nu Min: (L) Vungzaching
8. Zi min: Nu Chingzaniang
9. Kitenni: 20th July, 1974, Kitengsak tu: Pastor PK Englian
10. Gil a gah goutan neihzah: 5 Pasal: 3 Numei: 2
11. Tu melmuh zah: 15 Pasal: 8 Numei: 7
12. Tulel a omna Saptuam: EBCC Pearsonmun
13. Tulel a kizatna: TBUC Member
14. Ordain Kum: 13th Dec. 1987, Ordain Petu: Rev T Jamkhothang
15. Pahtakna lai san kum: 2022
16. Toupa kiang a tawldam ni: 06th Nov, 2023, Vui ni: 07th Nov, 2023
17. Natna/Damlouhna: Cancer
18. Vuitu Pastor & Saptuam: Pastor G. Sanglian, EBCC Pearsonmun
19. Saptuam a kizat khakna:
 - i. Division Executive Committee
 - ii. Local Upa Committee/TBUC (since 1982)
 - iii. Missions Committee (Local & Lamka District)
 - iv. Tuailaipawl/KTP
 - v. Naupang Sinsaktu/KNP
 - vi. Sub-Committee tuamtuum



20. A tanchin gelhbeh tuaksakte:

Nek-leh-tak zonna toh kisai in Carpentry Workshop bawl a, Pathian hehpihna ziak in a zi-leh-tate kem piching in enkol hi. Makai ginom leh muanhuai ahih ban ah, vaihawm siam leh thukhensiam tak ahi. Mi polnuam mahmah ahi a, heutu mai hilou in "makai" etton tak ahi. Pathian gam nasepna ahih nak leh, amah mimal vai te a nihna a koih in, awlmoh tak in diangkhe pahpah hi. A tuailai tung a kipan in saptuam ah kizang a, Department teng phial leh Sub-Committee tuamtuum ah mohpuakna gol pipi - Chairman, Superintendent, Secretary leh a dangdang letsak in om hi. Kum 35 Active Upa Ordain ahih sung in Chairman hihna kum 13 sung lenkha a, Secretary kum 11 sung lenkha hi.

Mi damthei tak himahleh, June 2023 khatawp lam in hong damlou a, hatlouhna tuamtuum hon nei a, July 2023 khabul in Cancer ahih thu kithei hi. Lupna ngak a hun bangtan hiam a ki-etkol nung in, November 06, 2023 in a muan Toupa kiang ah tawldam ta hi. Kum hiai tan makaih tu, Toupa leh A Misiangthou te lak a zahlak hetlou a kemtu i Toupa kia in thupina tang hen.

Toupa' khasiangthou in a nutsiat a inkuan leh Saptuam te khamuan in makaih zel hen aw. ■



Kipahthu Genna THUMNA MAKAI

DECEMBER 2023

1 SINTAWPNI: December kha honmusak i biak Pathian kiang kipahthu gen ni. December 2-4 sung Biblical Baptist Church in chialpi neiding a, Rev K Kamchinkhup, Director of Missions in Pathian thutak gending, thumna ah pawk ni.

2 KIGINNI: December 2-4 sung EBCC Hebron in Nungzuihna Chialpi neiding a, Evan T Damkhotang thugenpi in pangding. December 3 in BCD Pearsonmun in chialpi neiding a, Evan Lianding Guite in Pathian thutak gending, Pathian kha thopna leh pawlna ngen in thumpih ni.

3 NIPINI: Saptuam School ten kumtawp ekzam result puangkhin in winter vacation zangta uh. Tu kumtawp tan honpi i biak Pathian kiana kipahthu gen in, school khawl sung naupangte ading in Pathian ompihna leh makaihna ngen in thumpih ni.

4 SEPPATNI: EBC Kumsim Khawmpi 75na kisakkholhna paillel, Pathian ompihna leh makaihna ngen in thum ni. Hiai hun a Mipi biakkhawmna a lapiding, Thangbiaklal Valte, Music Promoter leh EBC Central

Choirte ading in Pathian makaihna ngen in thumpih ni.

5 SEPNAWNNI: December 7 in Kumsim Khawmpi 75na a Ordination tangding Pastorte leh Upa ten Orientation neiding ua. Manpha leh lohchingtak a zoh ahihna ding in Pathian ompihna ngen in thum ni.

6 NILAINI: Gamla leh nai a kipan Khawmpi zangding a hongpaite buaina bangmah tuaklou a, lamzangtak a hong tunkim siau siau theihna ding un Toupa pina ngen in thum ni.

7 NINGANI: EBC Kumsim Khawmpi 75na a Bible Study pitu ding, Rev Paukhanmang Guite, Principal, GBC leh thugen ding Rev Dr S Vung Minthang, GS ading in Pathian Kha thopna leh makaihna ngen in thumpih ni.

8 SINTAWPNI: Khawmpi vaihawmna nikhat ni, Pathian deihna bang a A Saptuam maban ding geel ahihna ding in, vaihawm Uliante leh Palaite a ding in Pathian Kha pawlna ngen in thum ni.

9 KIGINNI: Khawmpi vaihawmna nihna tan a honpi i biak Pathian kiang a kipahthu gen in, thupuknate saptuam hoihna ding leh khantouhna

ding a hong hihchiat theihna ding in thum ni. Zingchiang Ordination leh mipi biakkhawmna hunte manphatak a zat ahihna ding leh Pathian phatna lapawl sading tuailaite banah khawmpi lohching leh manphatak a zoh ahihna ding in thumpih ni.

10 NIPINI: Bethel Home Mission neitu leh enkaitu Unaupa Pauven Ngaihte leh Inkuan ten tulai buaina ana thuakha mahmah uh, tuin Moreh pansan in semlel ua, buinate ziaka haksatna atuahte uapan Pathian ompihna leh makaihna ngen in thumpin ni.

11 SEPPATNI: EBC Kumsim Khawmpi 75na lohching leh gahsuahtak a honzousak i biak Pathian kiang kiphathu gen ni. Khawmpi 76na Ulian ding a Toupa'n honpiak thakte leh GEC member thakte ziak a kiphathu gen in, amauten Toupa deihna bang a saptuam hon makaihzal theihna ding un thumpih ni.

12 SEPNAWNI: December 12-15 sung EBCC Dorcas Veng in Numei Kileh Camp neiding a, Evan T Damkothang thugenpi in pangding. Pathian kha pawlna leh makaihna ngen in thumpih ni.

13 NILAINI: December 13 in Child Coordinator saina in Singngat Division sunga BCD Sinsaktute Orientation leh Sinlaibu thakte pulakna program EBCC Singngat ah omding a, Rev M Ginminthang, Child Co-ordinator in sinsak ding, thumna ah phawk ni.

14 NINGANI: December 15-17 sung EBCC Mission Compound in Chialpi neiding a, Rev K Kamchinkhup, Director of Missions thugenpi in pang ding. Hiai hun toh kituak mah in EBCC Moria in Chialpi neiding a, Evan Lianding thugenpi in pangding, Pathian Kha pawlna leh makaihna ngen in thumpih ni.

15 SINTAWPNI: December 16 in Mizoram Division sung a local BCD sinsaktute Orientation leh Sinlaibu thakte pulakna hun EBCC Mimbung ah omdinga, Rev M Ginminthang, Child Co-ordinator in sinsak ding. Program lohchingtak a zat ahihna ding in thumna ah phawk ni.

16 KIGINNI: December 16-20 sung ESC, Gangte Milun Camp, Jacob Taona Moul ah omding a, Evan. T Damkothang in Pathian thutak gending. Pathian ompihna toh lohchingtak a zoh ahihna ding in thumna ah phawk ni.

17 NIPINI: Pathian makaihna toh buaina tampi lak ah Convention Book House nasepna paithei zel, kiphathu gen in, manager leh semtute a ding in Pathian pina ngen in thumpih ni.

18 SEPPATNI: December 19 in Thanlon Division sung a local BCD Sinsaktute Orientation leh Sinlaibu thakte pulakna program EBCC Thanlon ah omdinga, Rev M Ginminthang, Child Co-ordinator in sinsakna peding, program maphatak a zoh ahihna ding in Pathian ompihna ngen in thum ni.

19 SEPNAWNNI: Saptuam Hostel, Suangdoh, Sinzawl, Thanlon leh Beth-Haran a sem, Wardente ziak a kipahtu gen in, khalam leh salam damna hohtak toh naupangte honkepzelna ding uah thumpih ni.

20 NILAINI: Gamsung buaina tungtawn a khalam halhna leh kitunding thakna hongtunna ding in Pathian buan in thum ni.

21 NINGANI: Saptuam chih ah Khristmas kisakkholhna hihtheih bang bang in pailal, Khrist naungek khalam a kichiantak a muthei ding a kisakkholhna ahihna ding in Pathian makaihna ngen in thum ni.

22 SINTAWPNI: Khristmas hun hongtung ding ahihtoh kiton in, i mission fieldte a semtu lungzuangtaka omte leh khamangthangte lungsim a phawkthak in, amaute ading in thum ni.

23 KIGINNI: Gamsung buainate ziak a Khristmas hunte sukbuai ahihlouhna ding in Pathian venbitna ngen in thum ni.

24 NIPINI: Khristmas hun sunga Pathian houpihna leh vehkhiakna michih in i tantheihna ding a, Khris khebul a kitulut in, a hehpihna ngen in thum ni.

25 SEPPATNI: Lemna Lal pianni hon musak i biak Pathian kianga kipahtu gen in, Amin phat ni. Inkuan, khotang leh gamsunga Pathian a kipan Lemna diktak tunding thak ahihna ding in thum ni.

26 SEPNAWNNI: Khristmas hunte manphatak a hon zangzousak i biak Pathian kiang kipahtu gen ni. December 27-29 sung EBCC Lailamveng in Nungzuihna chialpi nei ding a Evan Lianding Guite in Tanchinhoih gending, thumna ah phawk ni.

27 NILAINI: Kumthak, 2024 akipan Saptuam School ten Academic Year April-March zuita ding uh, lamzangtak a hongpai theihna ding in thumna ah phawk ni.

28 NINGANI: Gamsung venbit na a matawng a pang volunteer te ziaka kipahtu gen in, a gimnate uapan tawldamna Pathian in a piaka, phatuamngai tak a honsep zomzel theihna ding un thumpih ni.

29 SINTAWPNI: Kumthak a sepnamun kisuankha ding semtute a hun taka a sepna munthak ding ua kipia a tuntheihna ding un thumna ah phawk ni.

30 KIGINNI: Saptuam a Toupa it mahmah thumtute leh thilpiak petute ziaka kipahtu gen in, Toupa'n a tamsem honpiakbehna ding in thumlai ni.

31 NIPINI: Kum, 2023 nitawpni hon musak i biak Pathian kiang a kipahtu gen in, tukum sunga i hihkhehnate ah athak in thupha tawi ni. Kumthak, 2024 programmete manphatak a i zatchiat theihna ding in thum ni.



BOOK POST

Postal Regd. No. MNP 07 | Regd. No. 22344/70

If undelivered, please return to

The Editor,
KHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India



Edited & Published by Rev. S. Vung Minthang for the Evangelical Baptist Convention
Designed and Printed at Convention Book House, Dorcas Hall Campus, New Lamka - 795006